

續文獻通考 卷之六十一

漢書門			
類	號	函	架
一	三	三	一
一	三	三	一
八	一	三	一
二	四	三	三

內閣文庫			
類	號	冊	函
漢			
書			

學校
養老
郷学
書院

問答

內閣文庫	
番號	漢 2431
冊數	81 (21)
函號	294 13





A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





續文獻通考卷之五十九

淺草文庫

皇明進士雲間王圻纂輯

學校考 幸學養老 三氏學

幸學

宋

理宗淳祐元年帝謁孔子遂臨太學御崇化堂命祭酒曹
鳳講禮記大學篇監學官各進一秩諸生推恩賜帛有
差以紹定三年所制伏羲堯舜禹湯文武周孔顏曾思
孟道統十三贊就賜國子監宣示諸生復親書朱熹白
鹿洞規賜焉 景定二年詔皇太子謁孔子于太學手
詔畧曰虎闡齒胃太子事也此禮廢久矣如設奠舍菜



之事我朝未嘗廢也然敦師敬道又不可拘舊制可令
太子謁拜焉太子既謁孔子還即上奏曰臣恭奉聖旨
擇用正月十五日令臣謁拜先聖文宣王於太學臣仰
體聖心祇承嚴訓區區愚衷因而感發焉蓋先聖之道
至我朝盛時運際文明真儒迭起而後有以續夫孟氏
之傳然其時諸說並駕未知統一迨乾淳間文公臣朱
熹與宣公臣張栻成公臣呂祖謙志同道合切偲講磨
如義利之辨如近思錄之書擇精語詳開牖後學誠有
功于聖門中間邪說又幾晦蝕陛下聖德奮興罷斥詖
邪表章正學然後人心一正聖道大明天下學士得沿
淵源而溯洙泗實萬世無疆之休今熹已秩從祀而栻

祖謙尚未奉明詔臣竊望焉從之 四年正月詔曰周
尊黃耆忠厚所基漢事三老祿養無缺陳埴林彬之史
季溫夙被擢用今皆耆年奉祀歲久宜示獎崇陳埴授
端明殿學士林彬之寶謨閣待制史季溫直華文閣各
因其祠 五年詔郡縣行鄉飲之禮

度宗咸淳三年車駕幸學祇謁先聖命講中庸畢執經官
陳宗禮講經官雷宜中各轉一級

遼聖宗統和十二年正月霸州民李在宥年百三十有三
賜束帛錦袍銀帶仍復其家 十六年六月詔婦人年
踰九十者賜物 太平四年二月詔賜諸宮分耆老食
道宗大安十年十二月三河縣民孫賓及其妻皆百歲復

其家

金海陵天德三年四月沂州男子吳真犯法當死有司以其母老疾無侍為請命官與養濟著為令

世宗大定十六年十二月詔諸流移人老疾者官與養濟

二十五年四月詔會寧府百姓年七十以上者補一

官九月次轄沙河賜百歲老嫗帛 甲申次遼水召見

百二十歲女直老人能道太祖開創事上嘉嘆賜食并

賜帛

元

世祖至元時順天路民王住兒過誤致死罪其母年七十

言於朝曰兒死則妾亦死矣乃宥其罪俾養母

誤致 宥其

成宗大德九年六月立皇子德壽為皇太子詔賜高年帛

八十者一匹九十者二匹親年七十別無侍丁者從近

遷除

武宗至大二年三月賜大都路民年九十者二千三百三

十一人人帛二匹八十者八千三百三十一人人帛一

匹

文宗至順二年四月寧國路涇縣民張道殺人為盜道弟

吉從而不加功拘囚七年不決毋老無他子孫中書省

臣以聞勅免死杖而黜之俾養其母

順帝至元四年正月詔內外廉能官父母年七十無侍丁

者附近銓注以便侍養 至正元年十二月詔民年八

十以上蒙古人賜繒帛二表裏其餘州縣旌以高年者德之名免其家雜役 八年帝臨國子學賜衍聖公銀印陞秩從二品定弟子員出身及省親奔喪制

按順帝每事驕奢不恤國政而獨於臨太學之事差近人情此由其人欲雖多而天理間有萌動之機耳

皇明

國朝南雍初建 大駕數臨位置規圖一由淵畫廟學既成復躬行釋菜之禮皮弁執圭再拜而後奠爵仍再拜而退崇祀之重前古莫及焉且躬 御講筵延禮司成坐講堂上親為論說既 諭戒師生復 賜宴竟日乃返儒均光寵未始前聞 列聖遵承踐祚之初必舉斯

典至我 世宗獨臨幸至再秩禮興教屢渙 天章尤近伐所未覩也

太祖洪武十五年禮部及儒臣奏定 視學儀前期一日有司灑掃殿堂設 御幄於大成門東上南向設 御座於彝倫堂至日學官率諸生迎 駕於成賢街左駕至學官及諸生俯伏叩頭興 駕入櫺星門止於大成門外 上入 御幄禮官入奏請具皮弁服次請行禮導引官導 上出 御幄就 御位百官各就位導引官導 上詣盥洗位搢圭盥悅出圭請酒尊所酌酒詣 先師神位前再拜百官皆再拜搢圭執事官跪進爵 上獻爵授執事官奠於神位前出圭再拜百官皆

再拜四配十哲兩廡分獻如常儀導引官導 上入

御幄易常服升輿詣學學官率諸生先列於堂下東西

上至彝倫堂 升御座贊唱學官諸生行禮五拜三

叩頭東西序立於堂下三品以上及侍從官以次入堂

東西序立贊進講祭酒司業博士助教四人以次升堂

由西門入至中堂贊舉經案於 御前禮部官奏請授

經於講官祭酒跪受 賜講官坐乃以經置講案叩頭

就西南隅設几榻坐講 賜大臣及翰林儒臣坐皆叩

頭序坐於東西諸生圍立以聽講畢祭酒叩頭退就本

位司業博士助教各以次進講畢出堂門復位贊唱有

制學官諸生列班俱北面跪聽 宣諭五拜叩頭禮

畢學官率諸生出成賢街跪候 駕還明日祭酒率學

官上表謝 恩 是年十二月復 幸學先是五月丁

巳 上謂禮部尚書劉仲質曰 國學新成朕將釋菜

今諸儒議禮議者曰孔子雖聖人臣也禮宜一奠而再

拜朕以爲孔子明道德以教後世豈可以職位論哉昔

周太祖入孔子祠將拜左右曰孔子陪臣不宜拜周太

祖曰百世帝王之師敢不拜乎遂再拜 朕深嘉其明

斷不惑於左右之言今 朕有天下敬禮百神於先師

之禮宜加尊仲質乃與儒臣定議 上服皮弁服執圭

詣先師再拜獻爵後又再拜退易服詣彝倫堂祭酒司

業博士助教進講 賜坐侍臣以次坐於東西講畢

宣諭學官諸生而還明日祭酒率學官上表謝 恩
 上從之己未遣官祭先師孔子以太牢禮畢祭酒吳顥
 等升堂諸生受業乙丑 上遂幸國子監謁先師孔子
 釋菜禮成退 御講筵祭酒吳顥等以次講畢 上謂
 之曰中正之道無踰於儒上古聖人不以儒名而德行
 實儒後世儒之名立雖有儒名或無其實孔子生於周
 末身儒道行儒行立儒教率天下後世之人皆欲其中
 正惜乎魯國君臣無能用之者當時獨一公父文伯之
 母知其賢責其子之不能從則一國君臣可愧矣卿等
 為師表正當以孔子之道為教使諸生成趨乎正則
 朝廷得人矣復 命取尚書大禹皋陶謨洪範 親為

講說反覆開諭群臣聞者莫不悚悅遂 賜宴竟日而
 還丙寅祭酒吳顥率博士龔敷等上表謝各 賜羅衣
 二襲官民生許恒等四百三十人各 賜春夏布衣
 成祖永樂四年三月辛卯朔 幸學先是 勅諭禮部曰
 朕惟孔子帝王之師帝王為生民之主孔子立生民之
 道三綱五常之理治天下之大經大法皆孔子明之以
 教萬世天下不可一日無生民生民不可一日無孔子
 之道朕 皇考太祖聖神文武欽明啓運峻德成功統
 天大孝高皇帝膺君師億兆之任正中夏文明之統復
 衣冠禮樂之舊渡江之初首建學校祀孔子 御經筵
 講書守帝王之心法繼聖賢之道學集其大成以臻至

治 朕承鴻業惟 皇考之成憲是遵今春時和躬詣
太學如 皇考故事稱 朕崇儒重道治安天下之意
布告群臣咸使聞之爾禮部擇日舉行其合行禮儀禮
部詳議以聞故 勅禮部尚書鄭賜言宋制謁孔子服
靴袍再拜 上曰見先師禮不可簡必服皮弁行四拜
禮於是進 視學儀注即洪武中所定也是日 上親
行釋菜禮 命吏部尚書蹇義戶部尚書夏原吉翰林
院學士解縉祭酒胡儼分獻十哲兩廡畢 上御藝倫
堂 命坐講祭酒胡儼講尚書堯典司業張智講易泰
卦大臣及翰林院詞官皆 賜坐講畢宣 諭曰六經
聖人之道彌綸天地昭揭日月垂憲萬世率由彝訓與

卿等皆勉之遂 命光祿寺 賜百官茶次日早祭酒

胡儼等上表及箋稱謝 賜祭酒以下宴於 奉天門

監生宴於 丹墀仍 賜儼及司業張智紵絲羅衣人

二襲學官王峻用等三十五人紵絲衣人一襲監生朱

璠等三千七十四人鈔各五錠時禮部會試舉人中式

者璠第一故璠爲諸生班首云壬辰 命工部修 太

祖高皇帝 詔書碑亭禮部奏立視學之碑 上親爲

製文 在南京國子監

朕惟帝王之興必首舉學校之政以崇道德弘教化正
人心成天下之才致天下之治唐虞三代之盛率由於
茲後世之君其學政或修或否是以不古若也我 皇

考聖神文武欽明啓運峻德成功統天大孝高皇帝龍
飛淮甸渡江首建學校親祀孔子日引儒臣講論經義
求古聖人之道身體力行既統有萬方即 詔府州縣
皆立學天下士子雲集京師復新作廟學於鷄鳴山之
陽親製教條頒布中外又 命天下增廣生員復其家
府州縣皆用春秋有事孔子賜以樂舞德教廣被海外
諸國及蠻夷酋長並遣子入學教化之隆視古爲盛
朕纘承大統仰遵成憲乃永樂四年三月朔日躬詣廟
庭謁先師孔子前期三日而將事之夕霧雲澄霽星緯
昭明既旦天宇穆清旭日鮮嚴含菜廟庭退即彝倫堂
文武群臣咸侍左右師儒在席諸生序列堂下 命祭

酒胡儼等以次講經成禮乃還夫學以明道也道之體
廣大光明配乎天地日月而其實不離乎彝倫日用之
間孔子明之上以承堯舜禹湯文武之傳下以爲後世
植綱常開太平於無窮而世之極其尊崇之體者非於
孔子有所增益特以著明其道之至天下不可一日而
無也惟我 皇考繼統帝王尊師孔子舉天下皆約之
使由於斯道是以治化之盛淪洽周徧薄海內外固不
嚮風慕義 朕景仰宏謨夙夜祇敬思維繼承之道不
敢怠違爰因視學謹叙述 皇考所以致隆治化之本
勒碑於廟俾我子孫臣庶尚克欽承於斯萬年

英宗正統九年

幸學儀注先是二月十五日

勅禮部

曰國家建學不隆文教以圖化理今太學新成 朕將
祇謁先師孔子勸勵師生爾禮部其擇日具禮儀以聞
禮部具上儀注

前期一日太常寺整理祭儀國子監灑掃殿堂錦衣衛
設 御幄於大成門東上南向設 御座於彝倫堂正
中鴻臚寺設經案於堂內之左至日置書於上設講案
於堂西南錦衣衛設鹵簿教坊司設大樂俱於 午門
外百官朝退先詣國子監門外迎 駕陪祀官先詣國
子監具祭服伺候行禮 駕出鹵簿大樂以次導行樂
設而不作是日早太常寺陳設祭儀於各神位前設酒
罇爵如常儀設 上拜位於先師神位前正中其日學

官率諸生迎 駕於成賢街上 駕至學官及諸生跪
俯伏叩頭興學官陪祀行禮諸生先由太學東西小門
入列於堂下東西序立 駕入櫺星門鹵簿大樂俱止
門外 上至大成門入 御幄禮官入奏請具皮弁服
次奏請行禮導引官導 上出 御幄由中道詣大成
殿陛下典儀唱執事官各司其事執事官先酌酒於爵
候導引 上至拜位贊奏就位百官亦各就位四配十
哲分獻官各詣殿陛東西階下兩廡分獻官各詣廡前
俱北向立贊奏 上鞠躬拜興拜興平身通贊百官行
禮同贊奏摺圭 上摺圭執事官跪進爵 上受爵獻
畢復授執事官奠於神位前奏出圭 上出圭四配十

哲兩廡分獻官以次詣神位前奠爵訖仍以次出殿外
東西向立贊奏 上鞠躬拜興拜興平身通贊百官行
禮同導引官導 上由中道出分獻官以次退 上入
御幄易常服訖禮官奏請 幸彝倫堂 上升輿禮
官前導由櫺星門出從太學門入學官先分列於諸生
前 駕至學官諸生跪候 駕過然後起仍前序立百
官分列堂外稍上左右侍立 上至彝倫堂升 御座
贊學官諸生行五拜叩頭禮東西序立堂下三品官以
上及翰林院學士升堂執事官各以次序立贊進講祭
酒司業以次升堂由東西小門入至堂中執事官舉案
於 御前禮官奏請授經於講官祭酒跪受 上賜講

官坐乃以經置講案叩頭就西南隅几榻坐講 上賜
武官都督以上文官三品以上及翰林院學士坐皆叩
頭序坐於東西諸生圍立以聽祭酒李時勉講帝庸作
歌與臯陶賡歌一章講畢叩頭退就本位司業趙琬進
講周易文言如儀畢出堂門復位贊唱有 制學官諸
生列班俱北面跪聽宣 諭曰聖人之道具在六經躬
行圖治君臣所同尚能勉之宣 諭畢贊行五拜叩頭
禮畢學官諸生以次退先從東西小門出仍於成賢街
右列班伺候尚膳監進茶 御前 上命光祿寺 賜
各官茶畢各官退列堂門外叩頭序立 駕興升輿由
太學門出升輦鹵簿大樂前導樂作 駕出太學門學

官諸生俟 駕至跪叩頭退百官常服先詣 午門外
伺候 駕還鹵簿大樂止於門外 上御 奉天門鳴
鞭百官常服鴻臚寺致詞行慶賀禮鳴鞭畢 駕興還
宮百官退明日國子監祭酒率學官監生上表謝 恩
上具皮弁服 御奉天殿錦衣衛設 丹陛駕百官
朝服侍班行禮畢 上易服於 奉天門禮官引奏
賜祭酒司業及學官衣服諸生鈔錠祭酒司業紵絲衣
一襲羅衣一襲諸學官紵絲衣一襲監生每人鈔五錠
駕還是日 上親御奉天門 賜武官公侯駙馬伯
都督以上文官三品以上及翰林院官祭酒司業監丞
博士助教學正學錄宴又明日祭酒司業率學官監生

復謝 恩

景皇帝景泰二年二月初三日 幸學前期月日 勅禮
部 朕惟帝王之道莫先於宗孔子 朕將祇謁廟庭
躬修祀禮退臨太學勸勵師生以丕隆文教於天下爾
禮部其擇日具儀注以聞本年正月初八日禮部擇日
具儀注題奏奉 聖旨是議官并學官添與紗帽帶監
生每人添與絢一疋着陳懋于謙王直陳循高穀江淵
商輅劉鉉分獻於是欽天監選擇景泰二年二月初二
日辛未宜用卯時吉餘同前是日祭酒蕭鉉講書經臯
陶篇天聰明一章司業趙琬講周易泰卦象辭
憲宗成化元年 幸學儀注

一欽天監選擇成化元年三月初十日丁巳宜用辰時
吉餘俱同前惟前期一日太常寺設大成樂器於殿上
列樂舞生於階下之東西至進爵時樂作 上受爵獻
畢復授執事官奠于神位前樂止贊出圭 上出圭四
配十哲兩廡分獻官以次詣神位前奠爵訖仍出殿門
外東西向立典儀唱送神樂作樂止贊 上鞠躬拜興
拜興平身禮官奏請 幸彞倫堂講畢宣 諭曰聖人
垂法具載六經爾師生各宜進修以輔我文明之治尚
其勉之次日謝 恩 賜祭酒司業學官及孔顏孟三
氏子孫衣服諸生鈔錠是日 賜宴武官都督以上文
官三品以上翰林院學士及祭酒司業學官三氏子孫

與宴 一前期各衙門辦事監生俱各取回迎 駕觀

禮 一 賜孔顏孟三氏子孫襲封衍聖公紵絲衣一

套屨帶一條五經博士顏議孟希文俱紵絲衣一套帶

一條各與紗帽一頂其餘族人各與素紵絲衣一套帶

一條 賜講官每人紵絲衣一套羅衣一套學官每人

紵絲衣一套監生每名鈔五錠吏典每名鈔二錠

孝宗弘治元年 幸學儀注先是吏部尚書王恕奏議釋

奠儀注禮部尚書周洪謨等具題奉 旨是尊先師當

以禮既成化初年有所舉只孔子前加幣用太牢改分

獻為分奠其餘儀物俱照永樂年例行欽天監選擇弘

治元年三月初三日丁卯巳時吉是歲始用幣加太牢

武宗正德元年 幸學儀俱同成化

世宗嘉靖元年 幸學儀注

一欽天監選擇嘉靖元年三月初七日甲寅宜用辰時
吉前期致齋一日太常寺預備祭儀祭帛設大成樂器
於殿上列樂舞生於階下之東西國子監灑掃殿堂內
外司設監同錦衣衛設 御幄於大成門之東上南向
司設監設 御座於彝倫堂正中鴻臚寺設經案於堂
內之左設講案於堂內西南至日置經於經案錦衣衛
設 鹵簿駕教坊司設大樂俱於 午門外是日早百
官免朝先詣國子監門外迎 駕分奠陪祀等官武官
都督以上文官三品以上及翰林院七品以上同國子

監官具祭服伺候行禮 駕從東長安門出鹵簿大樂
以次前導樂設而不作太常寺先陳設祭儀於各神位
前設帛設酒罇爵如常儀司設監設 上拜位於 先
師神位前正中學官率諸生於成賢街左迎 上至大
成門外降輦禮部官導 上入 御幄禮部官奏具服
上具皮弁服訖奏請行禮太常寺官導 上出 御
幄由中道詣大成殿陛下典儀唱執事官各司其事執
事官各斟酒於爵候導 上至拜位贊就位百官亦各
就拜位四配十哲分奠官各列於陪祀官前俱北面立
贊迎神樂作樂上贊 上鞠躬拜興拜興平身通贊分
奠官陪祀官行禮同贊釋奠搢圭 上搢圭太常寺卿

跪進帛樂作 上立受帛獻畢授太常卿奠於神位前
樂止進爵樂作 上立受爵獻畢復授太常卿奠於神
位前樂止贊出圭 上出圭四配十哲兩廡分獻官以
次詣神位前奠爵訖各以次退就原位贊送神樂作樂
止贊 上鞠躬拜興拜興平身通贊分奠官陪祀官行
禮同贊禮畢太常寺官導 上由中道出 上入御幄
更翼善冠黃袍訖禮部官入奏請 幸彝倫堂 上升
輿禮部官鴻臚寺官前導由櫺星門出從太學門入諸
生先分列於堂下東西相向祭酒司業學官列於諸生
前 駕至祭酒以下及諸生跪伺 駕過然後起序立
北向百官分列堂外稍上左右侍立 上至彝倫堂升

御座贊祭酒司業學官諸生行五拜叩頭禮武官都
督以上文官三品以上及翰林院學士升堂光祿寺預
設連几於左右執事官各以次序立贊進講祭酒從東
階升由東小門入至堂中鴻臚寺官舉經案進於 御
座稍前禮部尚書奏請授經於講官祭酒跪禮部尚書
以經授祭酒祭酒受經置於講案訖復至堂中叩頭
上賜講官坐祭酒復叩頭就西南隅几榻坐講 上賜
武官都督以上文官三品以上及翰林院學士坐皆叩
頭序坐諸生圍立於外以聽祭酒趙永講尚書大禹謨
篇帝曰俞允若茲一章講畢以經置於案叩頭退出堂
外就本位司業吳惠從西階升進講周易乾卦文言時

乘六龍一節如儀退就位鴻臚寺官奏傳制內侍坐
官起立贊有制祭酒以下學官及諸生俱北面跪聽
宣諭曰聖人之道具在六經講明道體用資治化爾
師生其勉之宣畢贊五拜叩頭禮畢學官諸生以次退
先從東西小門出列於成賢街右伺候尚膳監進茶
御前上命光祿寺賜各官茶各官復坐飲茶畢退
列於堂外叩頭分班序立鴻臚寺奏禮畢駕輿升輿
出太學門升輦鹵簿大樂前導樂作祭酒以下及諸生
伺駕至跪叩頭百官常服先詣午門外伺候駕
還鹵簿大樂止於午門外上御奉天門鳴鞭百
官常服鴻臚寺致詞行慶賀禮畢鳴鞭駕輿還官

百官退初八日襲封衍聖公率三氏子孫國子監祭
酒率學官監生上表謝恩上具皮弁服御奉天
殿錦衣衛設鹵簿駕百官朝服侍班行禮畢上易
服御奉天門禮部官引奏賜祭酒司業學官及三氏
子孫衣服諸生鈔錠畢駕還是日上御奉天門
賜宴武官都督以上文官三品以上及翰林院學士并
檢討以上祭酒司業學官三氏子孫及禮部及太常光
祿鴻臚寺執事官員與宴初九日祭酒司業率學官監
生謝恩上賜勅勉勵師生祭酒捧置彩輿師生
迎導至太學開讀行禮如儀初十日祭酒司業率學官
監生復謝恩一各衙門辦事監生俱各取回迎

駕觀禮 一 賜孔顏孟三氏子孫襲封衍聖公紵絲衣一套犀帶一條紗帽一頂五經博士顏重德孟元各紵絲衣一套帶一條紗帽一頂其餘族人各與素紵絲衣一套 一講官每人照例各與紵絲衣一套羅衣一套其餘學官每人與紵絲衣一套監生每名鈔五錠吏典每名鈔二錠 是年續定 幸學儀注 聖駕將至陪祀官武官自都督以上文官三品以上翰林院官七品以上同國子監官具祭服伺候行禮 駕至櫺星門外卽降輦步入 御幄易常服祭畢仍自 御幄步出櫺星門外陞輦次日襲封衍聖公率三氏子孫國子監祭酒率學官諸生上表謝 恩是日 賜三氏子孫衍

聖公等及祭酒司業宴於禮部 命本部尚書行禮餘如成化間儀 十二年以 先師祀典既正再視學命大臣一員致奠啓聖公祠先是 嘉靖十年十一月十六日禮部尚書兼翰林院學士夏言等具題本月二十四日奉 聖旨先師祀典既正 朕當躬謁於是欽天監選擇三月十三日丙辰宜用寅時吉餘同元年儀惟習禮公侯伯俱迎 駕聽講觀禮晚受宣 諭班列於學官之次諸生之前是日祭酒林文俊講虞書益稷篇元首明哉股肱良哉庶事康哉司業馬如驥講周易頤卦孔子彖辭天地養萬物聖人養賢以及萬民頤之時義大矣哉講畢退就本位祭酒以下學官及諸生俱

北回跪聽宣 諭曰 朕惟治平之道備載六經爾諸
子宜力講求體行以資政化其勉之 十三年三月祀
太學釋奠先師進諸生橫經布講 諭以敦本務實勿
徒事詞章學官 賜帛有差

穆宗隆慶元年五月 命公侯伯應襲子弟俱赴國子監
習禮 八月癸未朔 上幸太學行釋奠於先師 命

輔臣徐階等分奠四配十哲兩廡啟聖祠 上御彝倫
堂 命武官都督以上文官三品以上及翰林院學士
坐 賜茶授祭酒司業經坐講 上宣 諭師生曰聖
人之道如日中天講究服膺用資治理爾師生其勉之
今上萬曆元年八月 上幸太學 命大學士陳以勤釋

奠於先師孔子 賜輔臣羊酒鈔錠有差 四年續定
視學儀注 駕至樞星門外降輦禮部官吉服導行
上入御幄禮部奏請具服 上具皮弁服訖禮部官
奏請行禮 上出御幄太常寺官導行 上由大成門
中道入盥洗詣廟中與嘉靖元年儀稍異餘俱同前儀
次日方行慶賀禮襲封衍聖公率三氏子孫祭酒司業
率學官諸生各上表謝 恩先期設表案於皇極殿
簷下裏王門外至日早錦衣衛設 鹵簿駕百官朝服
侍班 上具皮弁服 御中極殿禮部官及各執事官
行禮如常儀鴻臚寺官奏請 陞殿導駕官前導樂
作 陞座樂止鳴鞭傳贊排班班齊鴻臚寺官致詞百

官行慶賀禮樂作五拜三叩頭訖樂止分班侍立序班
引衍聖公三氏等族人國子監師生過中贊鞠躬樂作
四拜興平身樂止贊進表樂作執事奉案由裏王門入
至簾前置定樂止贊宣表目鴻臚寺堂上官官員隨禮
訖堂上官捧表目過中內贊贊跪外亦贊跪進表官俱
跪宣畢贊俯伏樂作興平身傳贊同樂止執事官奉案
過東邊贊鞠躬樂作進表官俱四拜興平身樂止各入
本班立鴻臚寺官奏禮畢鳴鞭百官退山仍守皇極
門朝服侍立上易常服御門鴻臚寺官傳奏事起
案執事官奉案置御路中序班引襲封衍聖公等并
族人及國子監祭酒等官諸生上御路贊跪禮訖官

奏請願賞承旨訖贊叩頭衍聖公并祭酒等叩頭
起執事官奉案過東邊鴻臚寺官奏事畢鳴鞭上興
還官百官退是日免賜宴後二日儀俱同前又
查成化元年令取三氏子孫赴京觀禮命衍聖公分
缺又查嘉靖十二年題准衍聖公及顏孟之博士禮
部先期差行人前去行取及另取孔氏老成族人五人
顏孟族人各二人一同馳驛赴京迎駕陪祀前期八
日內閣及執事官赴國子監習儀至日習禮公侯伯
俱迎駕聽講觀禮跪受宣諭班列於學官之次諸
生之前三氏族人聽講序立文官之次各衙門辦事監
生俱取回迎駕聽講觀禮

養老事例

太祖洪武元年令及年七十以上者許一不侍養免其雜
差後因五年壬子夏五月詔中外學宮行養老之
禮先是因太祖念海內異俗思化民俗以復其古遂
命禮部考儀禮及唐宋之制又采周官屬民讀法之旨
參定每歲孟春正月孟冬十月有司偕學官率士大夫
之老者行之于學官其民間里社以百家為一會擇長
或里長至之百人內以年最長者為正賓餘以齒序坐
每季行之于里中大都皆奉于正齒位之說而賓興賢
能春秋習射亦可通行焉酒脯不誇奢靡若讀律令則
瑛刑部所編申明式諭書兼讀之其武職衙門在內各

衛親軍指揮使司及指揮使司凡鎮守司每月朔日亦
以大都督府所編戒諭率僚佐讀之 制曰可遂 詔
應天府及直隸府州縣并各布政司府州縣俱舉行之
八年乙卯再頒示天下申飭之

十六年頒行鄉飲酒禮圖式 一各處府州縣每歲正
月望日十月朔日舉行于學宮除僎賓外衆賓序齒列
坐其僚屬則序爵前一日執事者于明倫堂依圖陳設
坐次至日主及僚屬司正先詣學遣人速僎賓以下比
至執事者報賓至主偕僚屬迎於庠門之外以入主東
賓西三讓之揖而後升堂東西相向立贊兩拜畢皆坐
僎至佾至儀亦同既齊至各就位執事者引司正由西

階升詣堂中北面立執事者唱僎賓以下皆立各相揖
執事舉酒授司正司正曰恭惟 朝廷率由舊章敦崇
禮教舉行鄉飲非爲飲會凡我長幼各相勸勉爲臣盡
忠爲子盡孝長幼有序兄弟恭內睦宗族外和鄉里
無或廢墜以忝所生讀畢司正遂飲酒以觶授執事仍
各相揖司正復位及僎賓以下皆拱立行揖禮如揚觶
儀及讀皆肅而聽之有過之人俱赴正席立聽讀畢執
事者舉僎案至賓前次僎次价次主三賓以下次第舉
之乃主獻賓執事者斟酒以授主主受爵詣賓前置于
席稍退贊兩拜賓答拜以次奠爵儀如之畢主復位賓
遂酬主賓起僎從之執事者斟酒授賓賓授酒詣主前

置於席稍退兩拜賓僎主皆拜遂就位坐酒三行湯三
品遂撤饌各起離席僎主僚屬居東賓价三賓衆賓居
西行兩拜禮遂送賓分東西行乃三揖出庠門而退
一里社每歲春秋社祭會飲畢行鄉飲酒禮所用酒斝
卽一百家內供辦坐以齒次年老者雖至貧上坐少者
雖至富必下之不許挽越違者以違制論有過犯者雖
年長而富亦坐席末聽讀律受戒諭供飲酒畢同退如
不行赴飲及強坐衆賓之上者爲頑民許主席及諸人
首告遷邊遠爲民主席及衆賓容隱者同罪其各里社
以百家爲一會內以里長主席其餘選年最高有德人
所推服者一人爲賓其次一人爲价餘以年齒叙坐如

有致仕者主席請以爲僕擇通文學者一人揚觶一人
讀律一人贊禮前期主詣賓門請曰某日行鄉飲酒禮
吾子年高德邵敢請爲賓賓曰其固陋恐辱命敢辭主
曰詢諸衆莫若吾子賢敢固請賓曰夫子申命之其不
敢辭主遂拜賓答拜請价亦如之但改請吾子爲价先
執事者設賓席于堂中稍西南向設主席于堂東南西
向賓六十以上者席于堂中上兩序東西相向如賓多
年幼者席于堂下阼階之南北面西上至日主迎賓及
獻酬揚觶讀律酒數行皆如學宮儀飲畢明日賓价僕
衆賓詣王家拜謝鄉飲之賜主出門拜謂辱昨日之來
一鄉飲之設所以尊高年尚有德興禮讓敢有誼譁

失禮者許揚觶者以禮責之其或因而致爭競者主席
者會衆罪之 十九年夏四月 詔曰昔元末播蕩海
內擾兵所在黔黎苦殃甚矣如此者一紀有奇朕 命
前征虜大將軍中山武寧王及公侯群將發兵諸道所
向克敵民得粗安統一天下曰 大明今十有九年然
奸臣在位謀間臣民恩本施而弗及德將布而沮行政
乖理悖莫甚於此獨去歲 大誥頒行民從朕 命至
奸擾吾民者循法而歛迹進士監生職任諸司想吾民
樂生有漸矣今特 命有司存問高年優恤無告鰥寡
孤獨廢篤殘疾者收入孤老歲給所用使得天年所有
合行事理條列于後凡民八十九十而鄉黨稱善者有

司以時存問若貧無產業年八十以上者月給米五斗
 肉五斤酒米三斗九十以上歲加帛一疋絮一斤其有
 田產能贍者止給歲酒肉絮帛惟應天鳳陽二府富民
 年八十以上 賜爵里士九十以上 賜爵社士與縣
 官平禮復其家冠帶服色別議頒行其鰥寡孤獨不能
 自給者悉蠲其差徭 二十年閏六月 命試禮部尚
 書李原名申諭有司行養老之政先是 太祖召原名
 諭之曰尚齒所以教敬事長所以教順虞夏商周之
 世莫不以齒為尚而養老之禮未嘗廢是以人興於孝
 弟風俗淳厚治道隆平曩者朕 詔天下 大明會典載
十九年令 行養老之政凡耆民年八十九十鄉黨稱善者有司以

時存問若貧無產業年八十以上者月給米五斗酒米
 三斗肉五斤九十以上歲加帛一匹綿一斤其有田產
 能自贍者止給酒肉絮帛其應天鳳陽二府富民九十
 以上賜爵社士八十以上 賜爵里士咸冠帶復其家
 尚虞有司奉行不至爾其以 朕命申之 會典云里士
社士與縣
官平 二十二年定鄉飲酒禮凡良民中年高有德無
 公私過犯者自為一席坐於上等有因戶役差稅遲悞
 及曾犯公杖私笞招犯在官者又為一席序坐中門之
 外其曾犯奸盜詐偽說事過錢起城詞訟蠹政害民排
 陷官長及一應私杖徒流重罪者又為一席序坐於東
 門之外執壺供事各用本等三家子弟各要分別三等

續文獻通考卷之九十一 禮考三十三
坐次善惡不許混淆其所行儀注並依原頒定式如有
不遵圖序坐及有過之人不行赴飲者以違制論
按圖席主對大賓主位于東南大賓位于東北介對僕
介位于西南僕賓位于西北是四正也三僕自大賓以
次而東三賓自僕賓以次而西司正從主而位于東南
以教官爲之主揚觶僚屬居東衆賓居西恭閱 太祖
此制不獨行于官而又令各行于里社不怒而勸懲攸
屬不言而情文交洽審若此不啻唐虞三代之風矣惜
乎爲有司者視爲故事未聞有着實行之者而况可責
之里社之小民乎

建文帝元年 詔軍民男婦有八十九十者 賜米一石

肉十斤酒三斗九十者加 賜帛一疋綿一斤若身犯
杖以上隸卒倡優不與所在鰥寡孤獨無產不能自存
者有司歲給米三石今親戚收養無親戚隣里養之毋
令失所

成祖末樂辛丑 詔民年八十以上有司給絹二疋布二
疋酒一斗肉十斤時加存恤 明年甲寅令民年七十
以上及篤廢殘疾者許一丁侍養不能自存者有司賑
給八十以上者仍給絹二疋綿二斤酒一斗時加存問
英宗天順八年 詔凡民年七十以上免一丁差役有司
歲給酒十瓶肉十斤八十以上者加綿二斤布二疋九
十以上者給冠帶每歲待一次百歲以上者給板木

世宗嘉靖中祭酒呂柟定 視學養老儀注惜不果行

按柟據開元禮圖參定養老禮儀 歲季春之月擇吉

日行養老禮於太學有司先奏定三師三少致仕者用

德行年高一人為三老次一人為五更三品上下年德

高邵者為群老併開具致政之老與其孤姓名事狀以

聞前期三日設 御幄於太學堂後設 御座於太學

堂正中南向莞筵粉純加藻席畫純次席黼純設三老

座於西楹近北東向設五更座次三老東向皆莞筵粉

純加藻席畫純設群老位於西階上東向皆蒲筵緇布

純加莞席玄帛純几席皆不相屬設致政之老與其孤

館幕於門外太常卿展宮懸列舞綴於庭設升歌於堂

上及舉麾位等一如元會之儀有司設罇於東楹之西

北向左玄酒有坫以置爵前期一日有司具牲帛祭器

祭先師孔子 上遣官行禮齋宿省牲陳設奠獻一如

丁祭之儀惟祝文曰維某年月日朔甲子 皇帝謹遣

某致祭於先師孔子是月某日養三老五更群老於太

學用幣敬伸奠告以顏子曾子子思子孟子配尚享昧

爽卒事復 命又設先老位於廟門之前陳設如儀至

日黎明鼓徵謦衆設六佾舞生皆至 駕乃出宮太學

官率諸 迎 駕于太學路左 駕至太學官及諸生

伏稽首興傳 制迎三老五更于其第三老五更俱朝

服乘安車導從如常儀擇史官充傳史二人朝服從之

其群老及致政之老與其孤則有司先戒之宿於太學以俟 駕至太學堂 上命官釋奠於先老禮畢太常卿導 上入 御幄易冠服出陞 御座執大圭協律郎跪俯伏舉麾金奏姑洗之均樂止太常少卿導三老五更皆杖各二人夾扶左右惇史執筆以從自西階升堂 上興揖進欲拜三老五更去杖攝齋皆稽首遜辭 上不果拜乃揖就座三老五更皆坐三老授几九卿正履進珍饈及黍稷等 上省之遂設于三老五更前工升歌鹿鳴三終太常卿引 上詣三老座前以大珪授侍臣執酒而饋訖有司以次進珍饈酒食于五更前又設酒食于群老前太常卿引 上詣酒罇所取爵

替酌酒訖太常卿引 上詣三老座前執爵而酌訖上卽座三老以下皆坐光祿卿進酒 上飲酒三老以下坐食飲酒各三爵笙入三終光祿卿進加餽羨飲酒各三爵間歌三終三老乃論父子君臣長幼之道治政之要五更飲亦如之 上俱虛躬聽受惇史執筆錄之乃大合六樂羽舞大韶以雲門咸池合之于舞大武以大夏大濩合之 上興冕而總干三老以下皆興稽首遜辭 上復卽座三老以下皆復坐飲酒各三爵樂九變畢太常卿跪奏樂闋致政之老與其孤館於門外者飲酒食畢皆入侍 制命有司曰養爾老幼毋違 朕命三老以下趣出 賜三老五更襲衣冠帶牢醴菜幣

其餘帛衣米肉三老以下序立于庭皆拜三稽首興分班序立有司奏禮畢上興出就駕還宮明日三老率五更以下詣闕謝表

尊年 恩例

高皇帝 詔諸耆老謁見而峴山周壽誼居首年一百十六歲 賜宴及鈔幣 天順中召京師人百四歲茹大中入見便殿 賜宴順天府 賜冠帶襲衣 命禮部尚書姚夔造其第賀之 成化中濟寧人王自能以百十六歲徵又七年終又 韓王奏群牧所千戶朱政魯祖信年一百六歲而終祖全一百二歲父鏞八十二歲見存三代皆以千戶致仕 詔信全俱進階宣武將軍

各 賜羊酒白米二石 弘治中太倉州毛弼年百歲大而孫澄狀元及第有司爲建人瑞狀元坊 福建林知府春澤百歲時有司爲蓋百歲坊而子侍郎應亮年七十三孫學憲如楚乞歸侍又四年而春澤始卒

三氏學

魏黃初中於闕里建三氏學專教孔顏孟三氏子孫也唐以來興廢不一 宋乾興元年孫興公守兗因廟建學請以楊光輔爲講書轉奉禮卽元祐四年尹復奏以文潞公薦爲教授而學正學錄分任其事前代皆孔子後爲之蓋當時教授自置也 元世祖中統初立曲阜廟學遴選師儒充孔顏孟三代子孫教授正錄各一員訓

其子弟比之常例優加擢用時大司農姚樞請以儒人
楊庸教授其三氏子孫入國學者俾同朝官子列任教
官者比常例每減一考入流學舊有田三千畝占于豪
民至順中孔思晦理而復之

皇明宣德中 詔三氏教授所學錄保任孔氏一人五十
五代克晏爲之後五十七代論五十五代克晏五十五
代克照五十八代公璜五十八代公杰五十八代公鉉
五十九代彥衢五十九代彥佩六十代承高六十代承
祚相繼代任

天順中給三氏教授印開生員歲格蠲孔氏田租

景泰弘治嘉靖隆慶四 幸學衍聖公率三氏子孫觀禮

公 賜大紅織金仙鶴羅紗帽金犀束帶三氏 賜
冠帶有差 又以衍聖公次子一人爲子息後得世襲
五經博士而嫡系在衢州者亦得世襲五經博士還其
西安祭田五頃在河南者世襲國子學正又推保族之
賢者一人世爲曲阜知縣又給復其家人五百名

宗人授官附

永樂中宗人孔諤以會試副榜第一人見 皇太子特授
左春坊中允後改御史 天順中宗人公恂自禮科給
事中超拜爲詹事府少詹事

續文獻通考卷之五十九終

續文獻通考卷之五十九

三

二百五十五

續文獻通考卷之六十

皇明進士雲間王圻纂輯

學校考 郡國鄉黨學

字學醫學
蒙古學附

宋

寧宗嘉定中趙彥敵監青龍鎮稅務重建鎮學以養士百里之間絃誦相聞是時趙崇本知崇安興學校捐俸請買開平廢寺田以充學廩又請佃西林興福二寺廢租以折納餘羨助養士之費

理宗景定初王鏜任江寧知縣縣舊無學鏜下車慨然以興學為任時值諸學置官鏜曰有師無學非所以稱上旨即建學於縣解之北又置田若干畝以備學之廩粟

嘉熙元年趙汝鏜知桐廬縣發縣帑五千緡增置學田養士 淳祐元年王泌知睦州修州學行鄉飲新釣臺書院次第脩舉

遼聖宗統和元年十二月歸州言其居民本新羅所遷未習文字請設學以教許之

道宗清寧元年十二月詔郡縣設學養士頒五經傳疏置博士助教各一員 咸雍時太公鼎爲良鄉令省徭役務農桑建孔子廟學部民服其化 太康時耶律孟簡爲高州觀察使修學校招生徒以循吏著

金

太宗時赤盞暉爲歸德軍節度使時宋州舊無學暉爲營

建學舍勸督生徒肄業者復其身入競趨之

世宗大定十六年四月詔京府設學養士凡十七處共千人初以嘗與廷試及宗室皇家袒免以上親并得解舉人爲之後增州學遂加以五品以上官曾任隨朝六品官之兄弟子孫餘官之兄弟子孫曾經府薦者同境內舉人試補三之一經府薦及終場免試者不得過二十人凡試補州府學生以提舉學校學官主之曾得府薦及終場舉人皆免試凡經史註疏會課學規一同太學之制 二十九年章宗已即位上封事者乞興學校推行三舍法及鄉以八行貢春官以設制舉宏詞事下尚書省集百官議戶部尚書鄧儼等謂三舍之法起于宋熙寧

間王安石罷詩賦專尚經術太學生補外舍無定員由外陞內舍限二百人由內陞上舍限百人各治一經每月考試或特免解或保舉補官其法雖行而多藉勢力尚趨走之弊故蘇軾有三舍既興貨賂公行之語是以元祐間罷之後雖復而宣和三年竟廢臣等謂立法貴乎可久彼三舍之法委之學官選試啟僥倖之門不可為法唐文皇養士至八千人亡宋兩學五千人今策論詞賦經義三科取士而太學所養止百六十人外京府或止十人天下僅及千人今若每州設學專除教授月加考試每舉所取數多者賞其學官月試定為三等籍之一歲中頻在上等者優復之不率教行惡者黜之庶

幾得入之道也上從其議遂計州府戶口增養士之數于大定舊制京府十七處千人之外置節鎮防禦刺史州學六十處增養千人各設教授一員選五舉終場或進士年五十以上者為之府學二十有四學生九百五十人大興開封平陽真定東平府各六十人太原益都府各五十人大定河間濟南大名京兆府各四十人遼陽彰德府各三十人河中慶陽臨洮河南府各二十五人鳳翔平涼延安咸平廣寧興中府各二十人節鎮學三十九共六百一十五人絳定衛懷滄州各三十人萊密路汾冀邢兖州各二十五人代同邠州各二十人博德洛棣亳各十五人防禦州學二十人一共二百三十五人餘十六州各十人以上共千八百人其長貳幕職內各以進士官提控其事仍具入銜泰和元年九月更定贍學養士法郡縣生員給民佃

官田六十畝歲支粟三十石 承安四年八月詔諸路學校生徒少者罷教官止以本州府文資官提控

宣宗興定元年二月尚書省以軍儲不足請罷州府學生廩給上曰自古文武並用向在中都設學養士猶未嘗廢況今日乎其令仍舊給之 時任天寵為威戎縣令縣故堡寨無文廟學舍天寵以廢署建之

女直學 金世宗天定四年以女直大小字譯尚書頒行之後擇猛安謀克內良家子弟為諸生諸路至三千人九年取其尤俊秀者百人至京師以編修官溫迪罕締達教之 十三年以策論取士始于諸路設汝直府州縣二十二中都上京胡里改恤類合懶蒲與婆速威

平泰州臨潢北京冀州開州澧州西京東京蓋州隆州東平益都河南陝西凡取府學生之制皆與詞賦經義生同又定制每謀克取二人若宗室每二十戶內無願學者則取有物力家子弟年十三以上二十以下者充凡會課三日作策論一道季月私試如漢生制 二十九年勅以女直進士提控其事具入官街河南陝西女直學承安二年罷餘如舊

元

世祖中統二年始命置諸路學校官凡諸生進修者嚴加訓誨務使成材以備選用 三年嚴忠範奏請補東平路廟學從之 至元初王遵為彰德路總管重修廟學

訓飭生徒褒勤黜怠賢才輩興 十三年賽典赤爲雲南行省平章雲南俗無禮義男女往往自相配偶親死則火之不爲喪祭子弟不知讀書賽典赤教以拜跪之節婚姻行媒死者爲棺槨奠祭教民播種爲陂池以蓄水濟旱創建孔子廟明倫堂購經史授學田由是文風稍興 十五年張立道除忠慶路總管先是雲南未知尊孔子祀王逸少爲先師立道首建孔子廟置學舍勸士人子弟以學擇蜀士之賢者迎以爲子弟師歲時率諸生行釋菜禮人習禮讓風俗稍變矣 十九年命雲南諸路皆建學以祀先聖 二十三年閏二月設江南各道儒學提舉司帝御德興府行宮詔江南學校舊有

學田復給之以養士初浙江行省理筭錢穀其急鬻所在學田輸其直于官利用監臣撤里見之謂曰學有田以供祭祀育賢才安可鬻耶遂奏罷之 是年大司農上諸路學校凡二萬一百六十所 二十五年十月尚書省臣奏令集賢院諸司分道鈎考江南郡縣學田所入羨餘貯之集賢院以給多材藝者從之 二十六年九月置高麗國儒學提舉司 二十八年令江南諸路學及各縣學內設立小學選老成之士教之其他先儒過化之地名賢經行之所與好善之家出錢粟贍學者並立爲書院凡師儒之命于朝廷者曰教授路府上中州置之命于禮部及行省與宣慰司者曰學正山長學

錄教諭州縣及書院置之路設教授學正學錄各一員
散府中上州設教授一員下州設學正一員縣設教諭
一員書院設山長一員中原州學山長學錄教諭並授
禮部劄付凡各府所屬州縣學正山長學錄教諭並授
行省及宣慰司劄付凡路州府書院設直學以掌錢穀
從郡守及憲府官試補直學考滿又試所業十篇陞爲
學錄教諭凡正長諭錄教授或由集賢院及臺憲等官
舉充之諭錄歷兩考陞正長正長一考陞散府上中州
教授上中州教授又歷一考陞路教授教授之上各省
設提舉二員正提舉從五品副提舉從七品提舉凡學
校之事後改直學考滿爲州吏例以下第舉人充正長

備榜舉人充諭錄有薦舉者亦參用之自京學及州縣
學以及書院凡生徒之肄業于是者守令舉薦之臺憲
考覈之或用爲教官或取爲吏屬徃徃人材輩出是
年司業司上諸路所設學校凡二萬一千三百餘
陶安曰先王仁愛斯民其政尤要者三治有封建養有
井田教有學校三代迹熄首變治養之制惟學校久而
益廣漢晉以下學盛于京師而郡縣無定設唐宋以來
學布于郡縣而教官無常銓縣倚郭者皆弗克特建附
隸郡庠而已今邑必置學學必置官祿雖輕而道則
尊勢雖孤而事則專是以儒者試仕願階乎此
二十九年詔江南州縣學田其歲入聽其自掌春秋釋

奠外以廩給師生及士之無告者貢士莊田則令覈數入官 至正間蒲理翰知鄭州下車首事廟學範銅爲祭器製革帛爲禮服 至元間司仁知輝州增飭學舍敦理師儒選秀民充弟子員復設鄉學以教之 是時段直以功授澤州長官招撫逃民澤爲樂土大修孔子廟置書萬卷迎儒士李俊民爲師以延四方來學者不五六年學之士子以通經被選者百二十有二人朝廷特命提舉本州學校事 時陳佑爲衛輝路總管創立孔子廟

成宗大德元年五月詔各省止存儒學提舉司一餘悉罷之 時李仲彬爲武安尹擇師教子弟必以孝弟忠信爲本春秋修行釋菜禮以易風俗爲已任

仁宗延祐二年楊景行以進士授贛州路會昌州判官創學舍禮師儒勸民出腴田以膳士弦誦之聲遂盛

時史堦爲常州路總教興教勸學即郡庠建尊經閣以儲書籍俾學者得以觀覽 皇慶元年敬儼爲浙江道廉訪使取憲司廢堂材木及諸路學廩之羨者建孔子廟民無勞費 三年五月置甘肅諸路儒學提舉司

英宗至治間趙鳳儀爲台溫路總管諭民喪祭婚嫁以禮 勸廟學延明師以淑後進

泰定帝五年王由義爲彰德路總管割俸修學 時白景亮爲衢州路總管郡學之政久廢從祀諸賢無塑像諸

生無廩給祭服樂器有缺景亮皆爲備之儒風大振縉紳稱頌焉

順帝元統二年二月詔內外各舉學校 是時月魯不花爲台州錄事司達魯花赤縣未有學乃首建孔子廟既又延儒士爲師以教後進 至元元年十月勅以所在儒學貢士庄田租給宿衛衣糧時宋文懿爲烏程縣丞首建學校以崇文教 至正七年韓鏞爲饒州路總管選民俊秀入學求者宿有學行者爲五經師朔望幅巾深衣以謁先聖每月考課以示勸勉 時文殊海涯監尤溪縣興學政增置弟子員及鄉社俱令立學擇師儒以主教事 時又有李起巖爲淦主簿勸民興學諭以

孝弟廉耻 時又有蘇宗端尹上海爲文廟置禮器凡籩豆壘爵琴瑟鐘鼓之屬莫不備具 時又有王至和知松江府考訂釋奠禮製執事者冠制 時又有夏思忠爲杭州路總管杭學兵火之後前守帖木烈思興造甫畢後被火燼思忠以興復爲己任因烈思舊緒盡購禮拜寺地以廣學基廟宇嚴整杭學遂爲浙右冠

字學 世祖至元六年置諸路蒙古字學中書省定學制頒行之命諸路府官子弟入學上路二人下路二人府一人州一人餘民間子弟上路三十人下路二十五人願充生徒者許免一身雜役以譯寫通鑑節要頒行各路俾肄習之至 成宗大德十年又定生員散府二十

人上中州十五人下州十人 元貞元年命有司割地給諸蒙古學生員餼廩其學官 至元十九年定擬路府州設教授以國子在諸學之上 大德四年添設字學生員上自國學下及州縣舉生員高等者從翰林院考試凡學官譯史取以充焉

醫學 世祖中統二年太醫院使王猷言醫學久廢後世無所師授學非其傳為害甚大乃遣副使王安仁授以金牌往諸路設立醫學其生員擬免本身差撥等役俟其學有所成每月試以疑難視其所對優劣量加勸懲後又定醫學之制設提舉綱維之凡隨朝太醫及醫官子弟與路府州縣學官並須試驗其各處名醫所述醫

經文字悉從考校其諸藥所產性味真偽悉從辨驗其隨路學校每歲出降十三科疑難題目具呈太醫院發下諸路醫學令生員依式習課醫業年終製簿解納送本司以定其優劣 二十八年廉訪副使陳詳建明州府醫學

王應麟記畧曰醫不可無學岐伯之師曰蹴佻季秦越人之師曰長桑君倉公之師曰公孫光陽慶然學孰為要一言蔽之曰仁程子謂醫書以痿痺為不仁最善明狀仁者又曰切脉可觀仁仁人心也天地生生之心人得之以為心心仁則疾病切身若保赤子萬物一體也不仁則善不勝利理泊於欲肝膽楚越也以仁存心以

心合天如涪翁之不求報宋清之不為市寵安常之好
施許叔微之陰功精義入神將得不傳之妙于筌蹄之
表其或專已意逆乃曰醫者意也是猶昧學古入官之
訓而曰何必讀書其害不止誤註本草而已

武宗至大五年七月仁宗已即位禁醫人非選試及著籍者毋

行醫學

陰陽學 世祖至元十六年始置諸路陰陽學詔江南若
有通曉陰陽之人各路官司詳加取勘依儒學醫學之
例每路設教授以訓誨之其有術數精通者每歲錄呈
省府赴都試驗果有異能則于司天臺內許令近侍
延祐初令陰陽人依儒醫例於路府州設教授一員凡

陰陽人皆管轄之而上屬于太史焉

皇明

郡國學校

國初兩京及中都俱設國子監天下府州縣俱設儒學其
後裁中都國子監而各都司衛所亦設學

太祖洪武二年十月辛卯 詔郡縣立學校曰古昔帝王

育人材正風俗莫先于學校自元入至中國夷狄腥羶

汚染華夏學校廢弛人紀蕩然加以兵亂以來人習爭

鬪鮮知禮義今朕統一天下復我中國先王之治宜大

華風以興治道今雖內設國子監恐不足以及延天下

之後其令天下郡縣並建學校以作養士類師生月廩

食米人六斗有司給魚字官月俸有差學者專治七經
以孔樂射御書教設科分教務未實材頑不率者黜之
八年立社學是年命御史臺巡國子生分教北方
建文中罷北平山東河南山西陝西五省及北學校
貢士請難後復故

大興選補生員事例

洪武初今在京府學生員六十人在外府學四十人州學
三十人縣學二十人日給廩膳聽于民間選補仍免其
家差徭二丁二十年令增廣生員不拘額數二十
五年奏准起取富民原係生員者送應天府學讀書
永樂三年令起取人匠內有生員照例送應天府學

宣德三年定增廣生員在京府學六十人在外府學四
十人州學三十人縣學二十人照例優免差徭 正統
元年令生員名缺許本處官員軍民之家及社學俊秀
無過犯子弟選補 十二年奏准生員常額之外軍民
子弟願入學者提調教官考選俊秀待補增廣名缺一
體考送應試 天順六年令廩膳有缺于增廣內考選
學問優等者幫補 弘治七年奏准廩膳有缺不許將
別學增廣調補 正德十年奏准都司衛所學原定一
年一貢者與設優等次等生員各四十名原定二年二
貢者與設優等次等生員各三十名原定二年一貢者
與設優等次等生員各二十名通行提學官考補以後

於優等內照例考選充貢有多餘者俱作附學不堪者不必取足 嘉靖二年令增順天府廩膳生員二十名 三年令增應天府學廩膳增廣生員順天府學增廣生員各二十名 十一年奏准承天府學廩膳增廣生員六十名其鍾祥縣學生員亦照例通隸府學 十五年詔各處學校廩膳生員有親老無人侍養願告侍親者聽親終復學其累科不第年五十以上願告退閒者給與冠帶榮身仍免本身雜泛差徭凡衛學 成化三年令衛學四衛以上軍生八十人三衛以上軍生六十人二衛一衛軍生四十人不及者不拘有司儒學軍生二十人 嘉靖二十一年題准直隸金山衛學照福建

平海衛學創添設廩膳二十名應給廩米華亭上海二縣出辦又題在貴州嘉定等三衛各設廩膳生員六十二名各該衛門通融處給廩米 隆慶二年題准直隸各衛儒學原屬衛官提調者仍以本衛官提調惟季考生員及考選童生聽各該巡按御史定季通判等項文職官管理 宣德七年令武官舍餘年十五以下許入府州縣學讀書 宣德七年令衛所官舍軍餘俊秀者許入附近府州縣學聽本處鄉試 景泰二年令雲南貴州軍民生相兼考補廩膳照例科貢 三年令各處軍生許考補廩膳照例科貢

凡士官入學成化十七年令士官嫡子許入附近儒學

正德十六年奏准歸順正官子孫但係一次送順天府
學食廩者不論事故及中式俱不許再補 嘉靖三十

六年題准歸順正官子孫照舊例送學食廩讀書 萬

曆四年題准廣西雲南四川等處凡改土為流州縣及

土官地方建有學校者令提學官嚴加查試果係土著
之人方准考充附學不許各處土民冒籍濫入

學規

太祖洪武二年詔天下府州縣立學校學者專治二經

以禮樂射御書教設科分教 三年定學校射儀前期

戒射定耦選職事充司正副司正司射司射器請射奉

爵收矢執旗樹鵠陳設訖至日執事者入就位請射者

引至射正官及各官員子弟士民俊秀者各就位司射

器者以弓矢置於各正官及司射前請射者詣正官前

圓揖畢引詣司射器前受弓矢訖復位司正執筭入立

於中後請射者詣司射前曰請誘射司射二人耦進

各以三矢搯于膠帶之右以一矢挾于二指間推年齒

相讓年長者為上射年幼者為下射上射先詣射位向

鵠正立發矢司正書中投筭置于中舉旗者如所射應

之射畢退立于傍讓下射者詣位射訖請射者俱引復

位收矢者收矢復于射者司正取筭中筭請射者次請

士民俊秀射次請官員子弟射次請品卑至品高者射

凡其就射位發矢筭書中奉旗收矢復位皆如前儀既畢
司正副司正各持筭白中于至射正官奉爵者酌酒授
中者飲之中的者三爵中采者二爵飲訖請射者請屬
官以下仍捧筭矢納于司射器還詣主射正官前相揖
而退于六年令今後一應文字只用散文不許為四志
誤後學八年五年頒禁例于天下學校鐫刻碑置于
明倫堂之左永為遵守一今後府州縣生員若有大
事于於已家者許父兄弟控具狀入官辯訴若非大事
含情忍性毋輕至于公門一生員之家父母賢智者
必愚癡者多其父母賢智者一自外入必有家教之方
子當受而無違斯孝行矣何愁不賢者哉其父母愚癡

者作為多非子既讀書得聖賢知覺雖不精通實愚癡
父母之幸獨生是子若父母欲行非為子自外入或就
內知則當再三懇告雖父母不從致身將及死地必欲
告之使不陷父母於危亡斯孝行矣一軍民一切利
病並不許生員建言果有一切軍民利病之事許當該
有司在野賢人有志壯士質朴農夫商賈技藝皆可言
之諸人毋得阻當惟生員不許一生員內有學優才
膽深明治體果治何經精通透徹年及三十願出仕者
許敷陳王道講論治化述作文詞呈稟本學教官考其
所作果通性理連僉其名具呈提調正官然後親齎赴
京奏聞再行面試如果真才實學不待選舉即行錄用

一爲學之道自當尊敬先生凡有疑問及聽講說須誠心聽受若先生講解未明亦當從容再問毋恃已長妄行辯難或置之不問有如此者終世不成 一爲師長者當體先賢之道竭忠教訓以導愚蒙勤考其課撫善懲惡毋致懈惰 一提調正官務在常加考較其有敦厚勤敏撫以進學懈怠不律愚頑狡詐以罪斥去使在學者皆爲良善斯爲稱職矣 一在野賢人君子果能練達治體敷陳王道有關政治得失軍民利病者許赴所在有司告給文引親齋赴京 面奏如果可采即便施行不許坐家實封入遞 二十四年令各處儒學每遇朔望有司官至日早詣學謁廟行香師生出大門

外迎接行禮畢請至明倫堂師生作揖教官侍坐生員東西序立講書提調官考課畢退師生復送至大門外回學其別廟行香師生不必隨行如春秋祭祀迎接詔旨師生仍依定例 又今生員熟讀 大誥律令歲貢時出題試之民間習讀 大誥子弟亦令讀律 又令教官人等務要依先聖先賢格言教誨後進使之成材以脩任用敢有妄生異議瞽惑後生乖其良心者誅其本身全家遷發化外 二十五年定禮射書數之法 一朝廷頒行經史律誥禮儀等書生員務要熟讀精通以備科貢考試 一遇朔望習射于射圃樹鵠置射位初三十步加至九十步每耦二人各挾四矢以次相

繼長官主射射畢中的飲三爵中采二爵四一習書依
名人法帖印五百字一書數務在精通九章之法

成祖永樂三年申明師生每日清晨陞堂行恭揖禮畢方
退晚亦如之生員會食肄業毋得出外游蕩

英宗正統六年令提調官置簿列生員姓名又立為籤公
暇揭取稽其所業提學官所至察提調勤怠以書其稱

否其生員有奸詐頑僻視師長齟齬教法者悉黜退
為民

憲宗成化三年令提學官躬歷各學督率教官化道諸生
仍置簿考驗其德行優文藝贍治事長者列上等簿或

有德行而劣于經義或有經義而短于治事者列二等

簿經義雖優治事雖長而德行或缺者列三等簿歲課

月考循序而上非上等不許科貢

孝宗弘治十六年題准生員不拘廩增附學敢有傲慢師

長挾制官府敗倫傷化結黨害人者本學教官具呈該
管官員查究得實依律問罪合充吏者發本布政司衙

門充吏役滿為民當差

世宗嘉靖十年題准生員內有刁潑無耻之徒號稱學霸

恣意非為及被提學官考核或訪察黜退妄行訛毀赴
京奏擾者奏詞立案不行仍行巡按御史拏問

十六年今士子文字敢有肆為怪誕不遵舊式者提學官即
行革退

廩饌

太祖洪武初令師生廩食月米六斗後復令日米一升魚肉鹽醢之類皆官給之 十五年令廩饌月米一石

英宗正統元年令師生日逐會饌有司僉與膳夫府學四名州學三名縣學二名

孝宗弘治三年奏准膳夫每名歲出柴薪銀四兩以備會饌之用 八年令膳夫每名歲出柴薪銀十兩若師生不行會饌有司失于供應聽提學官究治

世宗嘉靖十九年題准孔顏孟三氏教授司生員廩米充州府通融處給

穆宗隆慶六年議准劄行順天府將交趾歸順土官膳夫

照例編給不許額外增編

考試事例

太祖洪武二十七年令生員入學十年之上學無成效送部充吏其有成效及十年以下照依入學年月編次造冊解部以備取用其科舉歲貢亦照編次起送 又令廩膳十年之上學無成效者亦送部充吏 二十之上不通義理者皆充吏其托故偽訟革職不應送者照卷追徵食過廩膳還官米數實收開繳戶部知數本生送吏部充吏 二十九令凡罷閒等項生員食糧年深以偽訟愚鈍等事革退者假父殘疾告回侍親者以富戶技藝戶倉脚夫起取戶丁因而在京潛住者侍親親終及病痊

續文獻通考 卷之六十一 十七
制終不行入學者因愚鈍患病侍親等事經斷罷閒後
以人材等項舉保爲官者皆充吏不追糧凡在學讀書
及在家丁憂病故者因父伯叔任軍官別無親男坐名
起取襲職者告單丁重役及父母年老侍親者因父爲
事代父起解間發充軍者父兄叔姪當軍戶內無丁告
退者爲手足殘疾耳目盲聾告退者爲事充軍工役及
以愚鈍犯法等故黜罷後爲事充軍工役者爲本支親
屬極刑黜退者戶內軍故勘合坐名勾補者皆免充吏
不追糧

成祖永樂二年令增廣生員入學十年若年二十之上魯
鈍不能行文者充吏

宣宗宣德三年奏准巡按御史會布按二司并提調教官
考試生員廩膳十年之上學無成效者發附近布政司
直隸發附近府州充吏六年以下鄙猥無學者追還廩
米爲民

英宗正統元年令廩膳六年以上不諳文理者充吏增廣
六年以上不諳文理者爲民 四年令生員以疾病罷
黜者免追廩米有犯註誤聽贖罪還學若犯奸盜詐僞
挾制官府毆罵師長教唆詞訟說事過錢包占人財物
田土等項廩膳追糧解京增廣附近軍民衙門俱贖罪
充吏其犯受賍奸盜不分廩增照例運輒運炭納米擺
站等項滿日發回原籍爲民 十年奏准提學官會布

續文獻通考 卷之六十一
政司堂上官一員兩直隸會巡按御史公同提調教官
考選生員年四十以上不諳文理者廩膳十年以上送
吏部六年以上送附近布政司增廣十年以上送本布
政司兩直隸送本府俱充吏六年以上并鄙猥殘疾者
悉黜爲民雲南貴州免考 十四年令生員有犯該發
充吏者廩膳免追糧米若犯受賊奸盜冒籍宿娼居喪
娶妻妾事理重者兩直隸發充國子監膳夫各布政司
充隣近儒學膳夫齋夫滿日原籍爲民廩膳仍追廩米
英宗天順五年令各處會官考選廩膳未及六年考不中
者追廩爲民六年令生員爭貢及越訴者俱充吏是年
定 勅諭以後奉以從事

憲宗成化九年奏准直隸考退生員免追廩米

風憲官提督

英宗正統元年奏准各處添設按察司副使或僉事一員
南北直隸監察御史各一員請 勅專一提督學校
十年令提學官遍詣所屬學校嚴加考試提督生徒學
業務見實效有不職者禮部都察院堂上官詢察具奏
罷黜

景皇帝景泰元年革罷提學風憲官聽巡按御史各司府
州縣官提督考察 又令按察司分巡各道副使僉事
照依提學官先奉 勅書事理提督兩直隸御史提督
英宗天順六年復設各處提督學校官各 賜勅諭 一

學者讀書貴乎知而能行先將聖賢經書熟讀背誦牢記不忘却從師友講解明白俾將聖賢言語體而行之敦尚孝弟忠信禮義廉耻之行不許徒務口耳之學將來朝廷庶得真才任用一爲學工夫必收其放心主敬窮理毋得鹵莽間斷其於修己治人之方義利公私之辨須要體認精切庶幾趨向不差他日出仕方能顧惜名節事業可觀一習學舉業亦窮理之事果能精通四書本經便會行文有等生徒不肯實下工夫惟誦舊文意圖僥倖出身今宜痛革此弊其所作四書經義策論等文務要典實平順說理詳明不許浮誇怪誕至於習字亦須端楷庶不乖教養之意一學效無成

皆由師道不立今之教官賢否不齊先須察其德行考其文學果所行所學皆善須禮待之若一次考驗學問踈淺及怠于訓誨者姑戒勵之令其進學改過若再考無進不改送吏部別用其貪滯不尚實跡彰聞者不必考其文學即送按察司直隸送巡按御史問理吏部別選有學行者補其缺一師生每日坐齋讀書及日逐會饌有司僉與齋夫膳夫府學膳夫四名齋夫八名州學膳夫三名齋夫六名縣學膳夫二名齋夫四名不許違悞缺役一生員考試不諳文理者廩膳十年以上發附近去處充吏六年以上發本處充吏增廣十年以上發本處充吏六年以上罷黜爲民未及六年者量加

續文獻通考卷之六十一
決罰勉勵進學 一 生員之家並依洪武年間例除本身外戶內優免二丁差役有司務要遵行不許故違
一 凡巡視學校水路乘驛舟陸路乘馬仍于本司帶書吏一名隨行陸路與官驢俱支廩給 一 府州縣提調官員宜嚴束生徒不許出外遊蕩為非凡學內殿堂齋房等屋損壞即辦料量工修理若恃有提督憲職將學校中一切合行之事推故不行用心整理量加決罰懲戒 一 所過之處遇有軍民利病及不材官吏貪酷害人專干奏請者從實奏聞 一 本職專督學校不理刑名如有軍民人等訴告冤枉等事許受詞狀輕則發下所在有司問理重則送按察司直隸送巡按御史提問

一 科舉本古者鄉舉里選之法今南北所取舉人名數已有定制近年奔競之徒利他處學者寡少往往赴彼投克增廣生員詐冒鄉貫隱蔽過惡一槩應試所在教官僥倖以為已功其弊滋甚今後不許違者聽本職及提調科舉官監試官拿問 一 布政司按察司官及巡按御史不許侵越提督者職事若以公務至府州縣亦當勉勵師生勤力學業不許推故不理若提督官行止不端許巡按監察御史指實奏聞 一 所轄境內遇有衛所學校一體提調整理武職子弟悉令其習讀武經七書百將傳及操習武藝其中有能習舉業者亦聽科舉 一 各處歲貢生員照例將食糧年深者嚴加考

續文獻通考 卷之六十一
試不必會官如果年深不堪充貢就便照例黜罷却以
次者考充務要通曉文理方許起送赴部 一廩膳增
廣生員已有定額廩膳有缺于增廣內考選學問優等
者幫補增廣有缺於本處官員軍民之家選擇資質聰
敏人物俊秀子弟補充不許聽信有司及學官徇私作
弊若有額外之數須嚴加考選通曉文義者存留待缺
不許將不堪者一槩存留躲避差徭 一古者鄉閭里
巷莫不有學即今社學是也凡提督去處即今有司每
鄉每里俱設社學擇立師範明設教條以教人之子弟
年一考較擇取勤効仍免爲師之人差徭 一師主於
學校一切事務並要遵依洪武間卧碑行不許故違

憲宗成化六年令貴州按察司分巡官兼理本處學校
孝宗弘治十七年令提學官有徇情將老病鄙猥之人濫
容在學及充貢者叅究黜罷

武宗正德十年給各按察司提督學校官關防 又令口
外衛學并各都司衛所土官學離本布政司寫遠提督
官不能歲歷者許各道分巡官歲加考校行提學官知
會

世宗嘉靖十六年題准大同所屬府州縣衛所儒學生員
俱令冀北道分巡官代理宣大俱令巡按御史帶管
二十六年議准甘肅各衛所儒學生員行甘肅巡按御
史帶管提調遇該科舉之年聽考送陝西布政司應試

今上萬曆三年換給提學官 勅諭 一聖賢以經術垂
訓 國家以經術作人若能體認經書講明學問何必
又別標門戶聚黨空談今後各提學官督率教官生儒
務將平昔所習經書義理着實講求躬行實踐以需他
日之用不許別創書院群聚徒黨及號召地方遊食無
行之徒空談廢業因而啓奔競之門開請托之路違者
提學官聽巡按御史劾奏遊食人拿問解發 一孝悌
廉讓乃士子立身大節生員中有敦本尚實行誼著聞
者雖文藝稍劣亦必量加獎進以勵頽俗若有平日不
務學業囑托公事或捏造歌謠興滅詞訟及敗倫傷化
惡過彰著者體訪得實不必品其文藝即行革退不許

徇情姑息亦不許輕信有司教官開送致被挾私中傷
誤及善類 一我 聖祖設立卧碑天下利病諸人皆
直言惟生員不許今後生員務遵 明禁除本身切已
事情許家人抱告有司從公審問倘有冤抑即爲昭雪
其事不干已輒便出入衙門陳說民情議論官員賢否
者許該管有司申呈提學官以行止有虧革退若糾衆
扛幫聚至十人以上罵詈官長肆行無禮爲首者照例
問遣其餘不分人數多少盡行黜退爲民 一國家明
經取士說書者以宋儒傳註爲宗行文者以典實純正
爲尚今後務將 頒降四書五經性理大全資治通鑑
綱目大學衍義歷代名臣奏議文章正宗及當代 誥

律典制等書課令生員誦習講解俾其通曉古今適于世用其有剽竊異端邪說炫竒立異者文雖工弗錄所出試題亦要明白正大不得割裂文義以傷雅道一
提學官奉 勅專督學校不許借事枉道奔趨撫按官于求薦舉各撫按二司官亦不許侵伊職掌行事若有不由提學官考取徑自行文給與生儒衣巾及有革退生員赴各衙門告訴復學者即將本生問罪革黜若提學官有行止不端怠玩曠職者許巡按御史指實劾奏
一該管地方每年務要巡視考校一遍不許移文代委及于隔別府分調取生儒以致跋涉爲害亦不許令師生匍匐迎送考畢即于本地方發落明示賞罰不許

攜帶文卷子別處發案致令書吏乘間作弊士子無所勸懲亦不許招邀詩朋酒友遊山翫水致啓俸門妨廢公務其水陸夫馬廩給隨帶吏書俱照常行 一提學官巡歷所屬凡有貪汙官吏軍民不法重情及教官于犯行止者原係憲司理當拿問但不許接受民詞侵官喜事其生員犯罪或事于對理者聽該管衙門提問不許護短曲庇致令有所倚恃抗拒公法 一廩膳增廣舊有定額迨後增置附學名目冒濫居多今後歲考務要嚴加校閱如有荒踈庸耄不堪作養者即行黜退不許姑息有捏造流言恩逞報復者訪實拿問照例問遣童生必擇三場俱通者始收入學大府不過二十人大

州縣不得過十五人 十一年題准人才衆多地方就試人衆許酌量增取但不許徇私過濫 如地方乏才即四五名亦不爲少若鄉宦勢豪干托不遂暗行中傷者許徑自奏聞處治 一兩京各省廩膳科貢皆有定額近來有等奸徒利他處人才寡少往往詐冒籍貫投充入學及有詭寫兩名隨處告考或假捏士大夫子弟希圖進取或原係娼優隸卒之家及曾經犯罪問革變易姓名援例納粟等項僥倖出身殊壞士習訪出嚴行拿問革黜若教官納賄容隱生員扶同保結者一體坐罪 一府州縣提調官員宜嚴束生徒按季考校凡學內殿堂齋房等屋損壞即辦料量工修理其齋夫膳夫學糧

學田等項俱要以時發給不許遲悞尅減 一生員之家依洪武間例除本身外戶內優免二丁差役 一生員考試不諳文理者廩膳十年以上發附近去處充吏 六年以上者發本處充吏增廣十年以上發本處充吏 六年以上者罷黜爲民 一儒學教官士子觀法所係按臨之日考其學行俱優者禮待獎勵其行履無過但學問踈淺者一次考驗姑行戒飭再考無過送吏部別用有老病不堪者准令以禮致仕若卑汙無耻素行不謹者不必試其文學即拿送按察司問革 一考貢照近日事例每歲預將次年應貢生員限年六十以下三十以上屢經科舉者六人嚴加考選取其優者充貢後

題准考貢止用一正一陪定限次年四月到部聽候
廷試文理不通者即行停降年老衰憊者姑授以冠帶
榮身不許但挨次濫貢其有停廩降廩者必考居一二
等方許收復十二年題准停廩降廩者考居三等亦准
復未收復者不許起送應貢如有濫貢及 廷試發回
五名以上提學官照例降調 一補貢有缺務查人文
未經到部果在一年以裏者將原給批咨朱卷追繳方
取年力精壯文學優長者一人補貢定限該貢年分次
年到部方准收考如有不遵舊例將年遠貢缺濫補市
恩者起送到部即將本生發回革廩肄業提學官參究
一遇鄉試年分應試生儒名數各照近日題准事例

每舉人一名取科舉三十名此外不許過多一名兩京
監生亦依解額照數起送有多送一名者各監試官徑
行裁革不許入場 一名宦鄉賢孝子節婦及鄉飲禮
宿皆國之重典風教所關近來有司忽于教化學校是
非不公濫舉失實激勸何有今後提學官宜以綱常爲
已任遇有呈請務須核真非年久論定者不得舉鄉賢
名宦非終始無議者不得舉節婦孝子非鄉里推服者
不得舉鄉飲賓僕如有妄舉受人請求者師生人等即
以行止有虧論其從前冒濫混雜有玷明典者照近例
徑自查革 一所轄境內有衛所學校一體提調整理
武職子弟悉令習讀武經七書百將傳及操習武藝有

續文獻通考 卷之六十一
願習舉業者聽社學師生一體考校務求明師責成量
免差役其行止有虧及訓誥句讀音韻差謬字畫不端
不通文理者即行革退

四年令各處鄉試畢日吏部會同禮部將各提學官從
公考察分別等第優異降調有差 六年題准南直隸
廬鳳淮陽四府滁徐和三州學校以江北巡按兼之湖
廣衡永二府柳州以上湖南道副使兼之辰州一府靖
州以辰沅道副使兼之廣東瓊州府以海南道副使兼
之各請專 勅行事每歲巡歷考校 十年題准鄉試
後提學官考察停止 十一年題准各提學每歲考校
一次入學務要不失原額間有他故巡歷不周次年即

行如數補足雖係科舉之年亦宜照歲考例總計三年
之內大府務足六十人大州縣務足四十五人其地方
果係科目數多就試人衆則于定額之外量加數名但
不許倍于原數如乏才之處亦毋得因而一槩取盈
十二年令南直隸提學御史仍兼管江北湖廣提學官
照舊專管該省惟瓊州府仍屬海南道

社學

太祖洪武八年 詔有司立社學延師儒以教民間子弟
十六年 詔民間立社學有司不得干預其經斷有
過之人不許爲師 二十年令民間子弟讀 御製大
誥者赴京禮部較其所誦多寡次第給賞又令兼讀律

令

英宗正統元年令各處提學官及司府州縣官嚴督社學不許廢弛其有俊秀向學者許補儒學生員

憲宗成化元年令民間子弟願入社學者聽貧乏不願者勿強

孝宗弘治十七年令各府州縣建立社學訪保明師民間幼童年十五以下者送進讀書講習冠婚喪祭之禮

宗學

武宗正德十四年令吏部于各王府長史紀善伴讀教授等官務擇學行優長堪為師範者除授凡世子衆子長子將軍中尉等年未弱冠者各隨資質嚴立課程

教養如法不得虛應故事撫按提學等官訪其賢否勤惰以聞

今上萬曆十年題准凡宗室之子年十歲以上俱入宗學其師即以本府教授紀善等官選取學行俱優者充之若宗生衆多則置教師或于宗室中推舉一人為宗正主領其事各生誦習皇明祖訓孝順事實為善陰騭等書至于四書五經史鑑性理亦相兼講讀俟年至十五許照例請封先給祿米三分之一仍習學五年驗有進益親王方與奏請出學支本等全祿嘉靖十四年例另城者該府郡王或管理府事者奏請其有放縱不循禮守法者學師具啓各該親郡王小則徑自訓

續文獻通考卷之六十一
責大則參奏降革

醫學

皇明除在京設太醫院外各王府設良醫所良醫正正八品副從八品各府設醫學正科從九品州設典科縣設訓科俱未入流各率醫生主療治疾疫及犴獄囚人患病諸務

陰陽學

皇明除在京設欽天監外各府設陰陽學正術從九品州設典術縣設訓術俱未入流各率陰陽生主申報雨澤救護日月諸務

續文獻通考卷之六十終

續文獻通考卷之六十一

皇明進士雲間王圻纂輯

學校考 書院

書院之制昉自石鼓嶽麓白鹿睢陽皆碩德鴻儒講道明教之地世所謂四大書院者是也厥後書院遍天下日增月益星羅而鱗次然多尚虛名而實學荒矣按諸本以淮海列四大書院之中蓋以淮海書院在丹徒疑卽應天書院也不知宋之應天書院乃在歸德府亦或以睢陽名之人以其字之相近遂以睢陽爲淮海非矣又玉海所謂四大書院者有嵩陽而無石鼓今當以玉海爲正

浚儀王氏曰漢初郡國往往有夫子廟而無校官且不
置博士弟子員其學士嘗課試供養與否不見經傳然
諸儒以明經教于其鄉率從之者數百人其齊魯燕趙
之間詩書禮易春秋論語名家者甚盛則設書院昉是
矣蓋未修庠序之教士病無所于學相與擇勝地立精
舍爲羣居講習之所若岳麓白鹿洞之類是也逮慶曆
熙寧之盛學校之官遂徧天下

宋元

白鹿洞書院在江西南康府廬山五老峯下唐李渤與兄
涉俱隱於此後爲江州刺史卽洞創臺榭南唐昇元中
因洞建學館置田以給諸生學者大集以李善道爲洞

主掌教授當時謂之白鹿國庠 宋朝太平興國元年

三月庚寅知江州周述言廬山白鹿洞學徒數千百人
請賜九經書肄習詔從其請仍驛送之五年六月己亥
以白鹿洞主明起爲褒信主簿賜陳裕三傳出身起裕以講

學爲業故有是命

咸平五年勅有司重修繕又塑宣聖十哲之

像祥符初直史館孫冕請以爲歸老之地皇祐五年其
子琛卽故址爲學館十間牌曰白鹿洞之書堂俾子孫
居而學焉郭祥正爲記淳熙六年南康守朱熹重建爲
賦示學者曰明誠其兩進抑敬義其偕立允莘摯之所
懷謹巷顏之攸執呂祖謙爲記

嶽麓書院在湖廣善化縣宋開寶九年潭州守朱洞始創

宇于嶽麓山抱黃洞下以待四方學者作講堂五間齋序五十二間孫邁為記咸平一年潭守李允則益崇大其規模三年王元之為記曰西京首述文翁東觀先書衛颯其理蜀郡教桂陽率以庠序為先云云中開講堂揭以書樓塑先聖十哲之像畫七十二賢瀟湘為洙泗荆蠻為鄒魯四年三月二十日辛卯允則奏岳麓山書院修廣舍宇生徒六十餘人請下國子監賜諸經釋文義疏史記玉篇唐韻從之祥符五年山長周式請于太守劉師道廣其居譚綺為記式以行義著八年召見便殿拜國子主簿使歸教授給詔因舊名賜額仍增給中秘書于是書院之稱聞天下乾道元年帥臣劉珙重建

為四齋定養士額二十人二年十一月張栻為之記淳熙十五年帥臣潘時廣二齋益額十人陳傅良為記淳祐六年賜御書岳麓書院四字揭之中門書院南風雩亭之下別建湘西精舍

應天書院

即睢陽書院應天府乃歸德府也宋曰應天金曰歸德

宋祥符二年二

月二十四日庚戌詔應天府新建書院以曹誠為助教初有戚同文者通五經業聚徒百餘人許宗度郭承範董循陳象輿王礪滕涉皆其門人于是誠即同文舊居建學舍百五十間聚書千五百餘卷願以學舍入官令同文孫舜賓主之故有是命并賜院額天聖三年應天府增解額三人六年九月晏殊言請以王洙充書院說

書從之明道二年十月乙未置講授官一員景祐二年十一月辛巳朔以書院為府學給田十頃

范仲淹南京書院題名記皇帝功揭日月澤注河漢金革塵積絃誦風希睢陽先生同文賁于丘園教育為樂祥符中曹氏請以金三百兩建學于先生之廬以舜賓幹其裕王濟掌其教張吉甫領其綱真宗嘉嘆面可其奏盛度文其記陳堯佐題其榜章甫如星縫掖如雲聚學為海淬詞為鋒二十年間羽儀臺閣益翩翩焉

嵩陽書院在河南登封縣太室山下五代時建宋至道元年七月甲辰賜院額及印本九經書疏祥符三年四月癸亥賜太室書院九經景祐二年九月十五日巳丑西

京河南府重修太室嵩陽書院王曾奏置學官詔以嵩陽


書院為額賜田一項 至道三年五月戊辰河南言甘

露降書院講堂已上古今號稱四大書院

北直隸

南宮北宅書院宋祥符三年七月壬寅詔南宮北宅大將軍以下各赴書院講讀經史諸院十歲以上並入學受經學書委侍教勤心誘勸

太極書院在燕京城內元中書行省楊惟中以河朔未知濂洛之學建書院及周惇頤祠以二程張楊游朱配食刻太極圖通書西銘于祠壁延趙復王粹等為師由是河朔始知道學 按元史世祖與姚樞議建選取遺書



八千餘卷置其中所載微不同

諫議書院在昌平院元為劉蕡建設山長主之

文靖書院在房山縣元趙密賈瓌為師劉因建

益津書院在霸州元宮君祺建

靜修書院在新安縣元劉英輩為劉因建

毛公書院在河間縣元建祀漢毛萇

董子書院在景州廣川鎮元王思誠奏建祀董仲舒

太行書院在獲鹿縣

封龍書院在元氏縣封龍山漢李躬授業之所唐郭震宋

李昉元李治皆嘗講學于此

西谿書院在元氏縣龍首峯西唐姚敬棲遁之所宋有九

經張著為山長復增葺之

中谿書院在龍首峯下宋李昉授業之所元中統初李治

增葺之

壁里書院在新樂縣西元邑人趙士廉所立義學祭酒蘇

天爵作記

明道書院在鎮寧軍即今開州初程純公以權御史裏行出判

鎮寧既去士民思之創以祀公後為士人講學之所

崇義書院在開州元國子生唐元建為育材之地且置學

田四頃餘請于朝賜名崇義

景賢書院在宣府城南紅桃口元相康里脫脫建別墅延

師訓子鄉人化之賜名景賢書院碑碣尚存

西關書院在龍門衛治東南

雲州書院在雲州堡東南

南直隸

明道書院舊在應天府學宮宋淳熙初劉珙建祀程明道後守劉榘改築新祠于鈴轄故地李珣扁其堂曰春風旁一塾曰主敬行恕尋廢後守吳淵更創理宗親書明道書院四大字爲額與四書院等馬光祖繼之又給田增廩

南軒書院舊在天禧寺宋張栻嘗讀書於此轉運使真德秀爲立祠後馬光祖建一堂求仁任道明理潛心四齋極高明樓且增撥田以惠學者元移置于城東明道

書院之西南

昭文書院在應天府湖熟鎮元至元間建

崇聖書院在鳳陽第一山漢孔安國父子相繼爲臨淮守後人因建書院于此上有先聖燕居殿遺址

西湖書院在潁州西湖濱宋歐陽修守潁樂其風土晚年終老于此遂築書院

學道書院一在長州縣學南宋咸淳間建以教言氏子孫元廢一在常熟縣西元至順間置名文學書院置山長甫里書院在蘇州府東五十里本唐陸龜蒙祠元元統間總管錢光弼奏建書院置山長

文正書院在蘇州府范仲淹宅元至正間總管吳秉彝請

府

以祠堂置

和靖書院在蘇州府治東南宋尹焞舊有讀書庵在虎丘寺後人立書院元祐初移建于此後復移虎丘寺名虎丘書院

鶴山書院在蘇州府城西南隅宋理宗賜魏了翁第宅于此并賜鶴山書院四大字元至順間博士柯九思奏復書院虞集撰記

孔宅書院在松江府城北七十里舊有孔子廟在慧日院側宋淳熙間院僧浚渠得寶玉璧三環二簪一藏之郡學蓋孔子三十四代孫頑宦遊至吳因立家廟葬衣冠于此寶蓋墓中物也元至元間里人章弼建書院以居

鄉俊之來學者

九峯書院在松江府治西北宋邑士衛謙建按華亭趙驥建書院議云華亭尉舊有折桂閣宋李夔為尉時生子綱于此後綱為相因呼相公閣今因建書院并立祠祀之

西湖書院在松江府城內瑁湖泳波亭舊址元郡守張之翰建

清忠書院在上海縣元至正間邑人章元澤建取宋仁宗賜其祖得象清忠二字為名

龜山書院在常州府城東南六里宋楊時寓常州講道于此紹定間郡守鄭必萬增剏其舊書堂為書院元設山

長

東坡書院在常州府治東南祀宋蘇軾地卽軾卒處也

淮海書院在丹徒縣治西宋南渡後淮士多寓京口因建

書院爲講學之地故名

濂溪書院在丹徒縣治東南宋周惇頤依舅氏鄭向居此

後人因建書院祀之

丹陽書院在丹陽縣宋景定中劉貢士建郡守朱禕孫聞

于朝賜額

申義書院在金壇縣治西宋太府丞張鎬家塾教族人

子弟取申之以孝弟之義爲名

龍山書院在金壇縣南顧龍山宋咸淳間立

茅山書院在金壇縣西茅山宋初建後廢紹定中知縣孫

子秀因其故址新之以待遠學

謝安書院在揚州府城東北召伯鎮因晉謝安鎮廣陵故

建

安定書院在秦州城西安定先生胡瑗如臯人爲師有道

後人宗仰因立書院又一在湖州府治東北宋淳祐中

建

文翁書院在無爲州儒學前內有文翁祠及碑記

龍眠書院在舒城縣治東宋李公麟讀書處蘇軾黃庭堅

嘗往來于此

三賢書院在合肥縣治東祀宋包拯馬亮王希呂

山谷書院在安慶府治東北今為府學文廟後有祠堂祀

宋黃廷堅

二良書院在安慶府治東祀漢文翁朱邑

近思書院在安慶府治北祀周程張朱四子

天門書院在太平府天門山宋郡守陳埜奏建理宗書額

內有周子二程子張子朱子張南軒呂東萊七賢祠

采石書院在太平府采石山宋嘉定間郡守賈實建為士

子講學之地

丹陽書院在當塗縣南黃池八十里元至大間建

齊山書院在池州府城西六十里元建設山長職教授

李白書院一在貴池縣華竹嶺一在青陽縣九華山化成

寺西斷碑存焉一在銅陵縣五松山一在石埭縣杉山

紫陽書院在徽州府治東宋淳祐中郡守韓浦為朱晦菴

建理宗書額賜之元陳浩記

明經書院在婺源縣元至大初里人胡淀建官為設山長

主之

山西

冠山書院在山西太原府冠山元呂思誠父祖數世皆讀

書于此後以宰相言賜額建于故宅虞集作記

松峯書院在樂平縣南四十里羅庄宣聖齋孔克威建呂

思誠作記

溫公書院在夏縣學之東元至正間重建祀司馬溫公

董澤書院在聞喜縣東三十里宋趙鼎世居董澤其後六世孫質翁仕元爲國子博士歸作書院于故里虞集爲記

晉山書院在太原府城東北隅

暖泉書院在蔚州西三十里暖泉里元工部尚書王敏建文忠書院在澤州陵川縣治南文忠元郝經謚也

山東

閔子書院在山東濟南府治東五里閔子墓前元建設山長

伏生書院在鄒平縣東北一十八里元主簿楊溫建祀漢伏勝

泰山書院在泰安州北五里宋孫明復講道之所石守道有記

洙泗書院在曲阜縣西北八里卽孔子講道之所元設山長

聖澤書院在汶上縣西南三十里一名孔堂世傳孔子宰中都政餘講學于此

尼山書院在曲阜縣尼山上宋慶曆間建廟元至順中孔思晦以故廟已毀民冒耕祭田且百年乃復其田請立書院從之

子思書院在尼山旁舊有營運錢萬緡貸于民取子錢以供祭祀久之民不輸子錢并負其本孔思晦理而復之

曾子書院在郟城縣西北六十里又嘉祥縣南四十里亦有曾子書院

性善書院在滕縣西北元大德間建取孟子告滕文公性善義

思聖書院在費縣西九十里元至元間建

野齋書院在東阿縣境內元翰林承旨李謙卒詔卽其故居建書院立山長以祀謙

弦歌書院在武城縣治南子游爲武城宰其治在今兗州府費縣西北此以名同故立書院祀之舊在縣西四十里元泰定中徙于南學士承旨劉賡扁名學士張起巖撰記

鄭玄書院在卽墨縣東南二十五里

東萊書院在萊州府治西南宋呂東萊以先世萊州故號

東萊先生後人慕之爲立書院于此祀焉

河南

儒林書院在河南禹州城南二十里元州人楊可道建

崇正書院在夏邑縣慈勝寺西

澮濱書院在永城縣南商城鄉元縣尹張思立建

頽谷書院在封登縣西南宋崇寧間建並立廟以祀宣聖

後廢復建

伊川書院在嵩縣治北元延祐間建東有九賢祠

洛西書院在永寧縣治東元延祐間建有五賢堂祀宋周

濂溪程明道伊川邵康節張橫渠司馬溫公後廢復建
同文書院在洛陽縣西南

諸葛書院在南陽府臥龍崗漢諸葛孔明故地之東元至
大中建程鉅夫作記

涑水書院在光山縣治西涑水先生宋司馬光號也光父
池為光山令時生光于此後人因構書堂祀光故名

謝顯道書院在上蔡縣宋建祀謝顯道
陝西

魯齋書院在陝西咸寧縣治東北元延祐中奉元路臣為
故臣許衡建

學古書院在三原縣治西北元延祐中因舊址重建蕭蘄
有記

橫渠書院在郿縣東五十里即宋儒張橫渠故居立書院
中有祠堂元泰定四年建文禮愷作記

岐陽書院在鳳翔府元天曆二年勅賜書院額祀周文憲
王仍命設學官春秋釋奠如孔廟儀

浙江
龜山書院在浙江餘杭縣治南宋崇寧末楊時知縣事有
遺愛于民民請立書院祀之仍延師教子弟其中

城南書院在杭州祀張九成

西湖書院在杭州府治北本宋太學故基元至元末肅政
廉訪使徐瑛改為書院

東岡書院在海寧縣東三十六里宋邑人賈氏置義塾元至正間改爲書院

宣公書院在嘉興府治北元至元間建祀唐宣公陸贄

傳貽書院在崇德縣治東北宋儒潛庵輔廣讀書之所廣

德朱熹教扁堂曰傳貽蓋以傳先貽後爲任也後人即

其所立書院文及翁爲記以祀廣焉

白社書院在崇德縣宋末衛富益建

東湖書院在湖州長興縣東北二十五里元時邑人蔣必

勝剗詔賜額名

釣臺書院在嚴州府城東五十里乃漢嚴光隱釣處宋范

仲淹始剗祠宇紹定中郡守陸子適即其地建書院

石峽書院在淳安縣東北五里宋方逢辰講道之所度宗

手詔賜額名

麗澤書院在金華府城東北五里宋呂祖謙會友講道于

此取易兌象以扁其居嘉熙中恩賜麗澤書院元御史

王龍澤有記

月泉書院在浦江縣西二里宋咸淳間知縣王霖龍構精

舍于泉上元改爲書院

四賢書院在金華府城中元時江浙省建以祀郡儒何基

王栢金履祥許謙

齊芳書院在蘭溪元唐良驥延金仁山講學于此

仁山書院在蘭溪祀金仁山

澱東書院在蘭溪宋葉誕讀書所

北山書院在金華盤溪上宋末爲何基立

桃源書院在寧波府城西三十里宋王說隱居教授神宗

特恩補官仍書桃源書院四大字賜之

廣平書院在奉化縣東一十里宋舒璘講學于此王應麟

作記

甬東書院在寧波府城東五里宋鄭清之建以祀樓昉理

宗御書扁賜之

慈湖書院在慈谿縣治北宋郡守劉黻以祀楊簡元設山

長主之

杜洲書院在慈谿縣西北六十里童居易讀書之所

東湖書院在寧波府城東三十里元時邑人陸黃祐建程

端學作記

鄞山書院在寧波府城西五里元時邑人趙儒建祀宋朱

文公後設山長主之袁桷有記

鄞江書院在寧波府治東南元時邑人張式良建

上蔡書院在台州府東湖上宋景定中州守王華甫建祀

上蔡謝良佐初良佐遭黨禁未解而卒子孫有流落台

州者州守黃當訪而得之因祀良佐于州學後華甫至

遂建書院徙祀焉又僊居縣南亦有上蔡書院

桐江書院在僊居縣西四十五里宋方斲本唐方干之裔

居台州朱熹嘗書鼎山堂扁遺之元皇慶中其孫志道

建書院以祀公

鑑溪書院在台州府城東南一百三十里元邑人柯醵建
廻浦書院在黃巖縣東南五十里元元貞中建

安洲書院在僊居縣東二十五里元至元中隱士翁森建
永嘉書院在温州府城西南宋淳祐中建中奉宣聖燕居
像東室祀伊洛諸儒西室祀鄉先賢

宗晦書院在樂清縣舊名執堂宋咸淳中改今名宗晦菴
也

中村書院在泰順縣宋淳祐中吳子良建
侯林書院在泰順縣宋淳祐中吳子益建

清獻書院在衢州府城北宋咸淳中郡守請于朝即趙抃

故居立書院因以并謚扁焉

柯山書院在衢州爛柯山右宋郡人毛友鄭可簡于此建
精舍讀書淳祐中郡守請于朝立書院

南塘書院在江山縣宋逸平先生徐存講學之所逸平卒
而朱子往吊書院已為毛氏墓田朱子因賦詩致哀令
重建于騎石山下曰逸平書院

包山書院在開化縣北三十五里宋汪應辰有軒名聽雨
紹定中改為書院

明正書院在西安縣東宋汪應辰及子達寓衢郡守張嶠
築室居之後人即此建祠咸淳中趙孟奎重建扁曰明
正

桂山書院在處州龍泉縣西十五里宋端平間邑人張奉
議立以訓子弟丞相吳潛題扁

石門書院在青田縣西七十里石門洞宋淳熙九年朱文
公提舉常平至此愛欲居之元至正中廉訪副使王保
始卽謝客堂故址建

明善書院在松陽縣

獨峯書院在縉雲縣東三十三里朱文公至此愛其山水
似武夷嘉定中郡人葉嗣昌建

美化書院在縉雲縣東六十里因朱文公講道于此嘉熙
中縣尉陳寔建

稽山書院在紹興臥龍山之陽宋淳祐中馬天驥建祠以

祀朱文公以公嘗提舉浙東常平也後吳革請祠爲書
院

高節書院在餘姚東北一十五里漢嚴子陵墓側宋淳祐
中劉公黼建有夫子燕居祠外置遂高絲風蒼雲三亭
扁華表于道旁曰客星山

鼓山書院在新昌縣祀石子重

江西

梧桐書院在江西奉新縣南唐時中庸明誠兩羅先生講
道之所山多梧桐故名

東湖書院在南昌府治東南宋郡丞豐有俊假李寅涵虛
閣故址創書院以館游學之士今爲南昌縣學

宗濂書院在南昌府治南宋江萬里以濂溪周惇頤嘗典是邦葺宇祠之扁曰宗濂精舍元移于東湖改爲書院又寧州治東旌陽山麓有濂溪書院卽周惇頤作簿時建相連有山谷書院

華林書院在奉新縣華林山宋雍熙中光祿寺丞胡仲堯建四方游學者常數百人

龍光書院在豐城縣西劔池廟側元至正間邑人陳必強建取寶劔龍光爲名

貞文書院在豐城縣南八十里元揭傒斯之父來成學行師表一方謚曰貞文後傒斯請立書院遂賜以額

鄱江書院在饒州府城北宋朱熹門人金去偽講學之所忠定書院在餘干縣琵琶洲宋丞相趙汝愚與朱熹講道處忠定汝愚謚也

東山書院在餘干縣冠山左趙汝愚弟汝覲建朱熹嘗講道于此謝枋得記

石洞書院在餘干縣東五十里今屬萬年縣宋雙峯饒魯講道之所

南溪書院在餘干縣東政新鄉今萬年縣境宋提刑柴中行講學之所元時其子孫作書院以教里族事聞爲置官

慈湖書院在樂平縣治東南宋楊簡爲令以禮讓變俗時號慈湖先生簡沒民思不忘因立書院

新田書院在浮梁縣古樓嶺宋侍郎李椿年建今其地名
義庠塢又縣之景德鎮有長薌書院宋李齊愈建

錦江書院在安仁縣西南四十里宋倪价講學處元至元
間其子鏗請賜額

初庵書院在德興縣治南元邑人傅立建立號初庵
稼軒書院在廣信府鉛山縣南二里宋辛棄疾讀書處初

名瓢泉書院後以其號名
端明書院在玉山縣治東宋端明殿學士汪應辰講學處

元監縣壽安始建書院蘇天爵記
象山書院在貴溪縣宋陸九淵講學之所袁甫建書院以

錢時主講
鵝湖書院在鉛山縣鵝湖山下宋朱熹與陸九淵會講于

此
疊山書院在上饒縣南安輯鄉宋謝枋得講學之所入公

桐源書院在貴溪縣西二十里宋國子學錄高可仰建以
教鄉之子弟

藍山書院在弋陽縣水南地元初張卿弼隱居教授于此
學者甚眾其門人楊應桂申益童為作書院處之虞集

記
景星書院在九江府城東唐李渤刺江州元和中以右拾

遺召不拜韓愈書有景星鳳凰爭先快觀之語後人因
建景星書院

景星書院在九江府城東唐李渤刺江州元和中以右拾

濂溪書院在九江府廬山麓宋周惇頤建後守潘慈明增

築朱熹為記

靖忠書院在彭澤縣治觀音山後元邑令王國輔建取晉

陶潛之靖唐狄仁傑之忠為名

盱江書院在建昌府南城縣治西北宋李觀教授之所中

有明倫堂前有洙泗堂左右列誠正格致四齋元末燬

南豐書院在南豐縣治東元至正間知州史文斌建中有

孔子殿左有曾鞏祠堂後有講堂齋舍

臨汝書院在撫州府城西南二里宋馮去疾以朱文公嘗

臨是邦故立書院于湖山上宋元皆有官領之

我峯書院在撫州城南青雲峯左宋叅政李璧屬縣令黃

幹建堂面我峯故名

槐堂書院在金谿縣學東宋令陳詠之建以陸子靜家塾

之名扁曰槐堂

鹿岡書院在宜黃縣南四十里宋邑人孫子野建

文溪書院在崇仁縣東陶家巷口運幹陳溪月建

草廬書院在崇仁縣南御書閣基前元邑令阿里建

邵庵書院在崇仁縣治北元邑令重喜建

青田書院在金谿縣北三十里元邑士洪觀瀾宗陸氏學

建此以祀三陸先生

柳塘書院在樂安縣治東後改梅隱書院元人建

鰲溪書院在樂安縣治東元邑人夏友蘭建吳澄記

高峯書院在臨江府新淦縣治東宋縣令黃榦建

清江書院在清江縣治東宋著作郎張洽建

金鳳書院在臨江府治東南隔江金鳳洲上宋國子司業

黎立輔建立輔又有講書堂在新喻縣

鷺洲書院在吉安府白鷺洲上宋淳祐間知吉州江萬里

建延歐陽守道以教俊秀

龍洲書院在泰和縣治南贛江之上宋嘉泰間縣令趙汝

暮建周必大記

文溪書院在泰和縣治西宋里人曾季禮講學授徒之所

邑令趙師夔記

雲津書院在泰和縣治南龍洲之上宋嘉定間里人劉逢

原建曾歷記

柳溪書院在泰和縣治西宋嘉定間里人陳德卿建嚴萬

全記

清節書院在泰和縣治北宋蕭楚以春秋教學者卒謚清

節元至正間其宗人繼文作祠扁曰清節書院

匡山書院在泰和縣東匡山下昔里人羅洞晦清修不仕

後唐徵拜官不就從遊益眾名所居曰匡山書院

磻溪書院在吉水縣西宋周澤之建

陽豐書院在永豐縣西元進士陳應求與弟起原建後賜

額設官領教

武城書院在永豐縣西元學士曾德裕建派自武城南分

故名吳澄記

雲興書院在萬安縣治西宋周惇頤趙抃皆嘗經此人因立像祀之且爲縉紳講學之地

西澗書院在瑞州府治西宋劉渙家高安子恕孫羲仲三世一節端平初知州張韞立書院西澗渙號也

樂善書院在瑞州府治南宋郡守王淹以郡中宗姓寔繁乃剏書院置田以教育宗子孤幼者

文溪書院在瑞州府城南文溪上宋陳仲微建爲讀書之所

正德書院在上高縣南三十里元提舉姜榮建趙孟頫書扁刻石

石溪書院在新昌縣東北四十里元提舉胡俊孚建

南軒書院在袁州府東湖上中有張南軒祠歲時祀之

鈴岡書院舊在分宜縣東宋建邑庠遂廢淳祐初邑宰王

抗建祠以祀周二程張朱仍扁曰鈴岡書院

胡安之書院在萍鄉東二里宋朱子門人胡安之讀書所

宗濂書院在萍鄉縣東五十里宋周濂溪監稅盧溪鎮時

立書院以授門人學後人卽其地建祠又于縣治南立

濂溪書院皆祀焉

張巖書院在萬載縣治東臨江儒學教授張千崖立有禮殿以祀先聖有祠以祀周程張邵司馬六君子虞集記

其事

濂溪書院在贛州府贛縣治東三里周濂溪嘗通判虔州
後人因建書院

先賢書院在贛州治東宋楊澹軒精舍故址其門人尚書
陳韓請于朝建之

安湖書院在興國縣東宋縣令何時建文天祥記
梅江書院在寧都縣宋縣令夙子興建
湖廣

東山書院在武昌府黃鵠山東宋建

南湖書院在武昌縣治東宋權壽昌軍事京規建元設山
長領之

龍川書院在武昌縣南金牛鎮元時領以山長

竹溪書院在蒲圻縣東五里宋建蘇軾書額

新溪書院在蒲圻縣宋進士周登仕建

疊山書院在興國州東一里湖堤上宋謝枋得寓居著書
于此今稱其地曰謝公墩

南湖書院在承天府沔陽州學宋建以祀武成王及狄梁
公張太冲

東山書院在荊門州東宋知軍孫鏞二子何僅讀書于此
後皆為狀元學者稱二孫先生為立祠稱東山書院

隆中書院在襄陽隆中山蜀漢諸葛亮嘗寓此後人因建
廟祀之元改為書院

鹿門書院在襄陽府治南任顯宗居此

長庚書院在德安府唐李白讀書處元程鉅夫記

河東書院在黃州府治東宋天聖中程珣為黃陂尉生二子顯願于官舍寶祐時守李節請建書院祀之

東坡書院在黃州府治東蘇軾謫居于此及去以田宅俾潘大臨陳慥教養學徒後人為建書院

南門書院在蘄水縣南謝朝宣建祀王逸少陸鴻漸蘇子瞻

公安書院在荊州府公安縣宋宣撫孟珙因蜀士聚于公安為建書院以没入田廬隸之元廉希憲嘗更新焉

白水書院在枝江縣西三里元拔都府抹溫司建

車渚書院在岳州府澧州東三十里其地一名螢渚晉車

胤聚螢讀書處

文山書院在澧州治南唐李羣玉讀書之所文山羣玉字也

溪東書院在澧州治東宋范仲淹嘗遊此後人慕之作書院祀焉

城南書院在長沙府城南臨湘門外宋張栻講學之地

碧泉書院在湘潭縣西七十里宋胡安國南遊築室其子

宏與張栻講道于此以近碧泉因名

文定公書院在長沙府治中祀胡安國

東萊書院在醴陵縣北四十里宋東萊呂祖謙讀書于此

漣溪書院在湘鄉縣東南漣水濱初在崑崙橋西宋嘉定

間真德秀帥潭命知縣徐質夫置立扁其堂曰春風德祐初燬知縣趙晟重建于漣水東元至正中知縣王文彪復移建漣水西

東岡書院在長沙縣東二十五里元中書左丞許有士父號東岡嘗讀書于此因賜額

喬岡書院在長沙縣西北九十里喬口鎮舊有三賢堂祀屈原賈誼杜甫元元統中邑人黃澹因設義學於此詔賜今額

文靖書院在瀏陽縣南宋楊時嘗宰是邑後人因建書院名以其謚

湘西書院在善化縣湘水西宋時建潭士以居學肄業爲重州學生月試積分高等升湘西岳麓書院生又積分高等升岳麓精舍生潭人號爲三學生劉輔之重建慶州書院在益陽縣治南江中元邑人劉履泰講學之所事聞詔授慶州書院山長

南軒書院在衡州府張栻朱熹講學處

石鼓書院在衡州府石鼓山唐元和間州人李寬讀書之所宋初勅賜額朱文公有記

南嶽書院在衡山掌教有官育士有田宋開禧中建寶慶中遷于集賢峯下元因之

杜陵書院在來陽縣北二里杜甫墓前

清溪書院在安仁縣清溪宋周必大嘗讀書于此後人因

建書院元至正間縣令王雪巖重修

沅陽書院在常德府城東北黃龍坡宋末丁易東建號石壇精舍元賜今額遺址碑刻尚存

浯溪書院在永州府祁陽縣治南元縣尉曾圭與子堯臣創中大殿奉先聖殿左祠祀唐元結顏真卿

濂溪書院在道州學西祀宋周惇頤理宗賜額

鶴山書院在靖州治北宋魏了翁建自為記鶴山了翁號也

作新書院在靖州學旁宋黃榮知靖州時建取書作新民義

四川

觀瀾書院在柳州興寧縣西建置未詳

紫巖書院在成都府綿州縣治南宋張浚讀書之所

丹梯書院在巴州南龕山宋時建

果山書院在順慶府城北五里蜀漢譙周建後郡人邊叔達以秘書監歸隱于此藏書萬卷今為南充學

柳溝書院在敘州府富順縣東九十里宋李文淵建

雲臺書院在南溪縣北雲臺山上有石鐫雲臺書院四大字尚存元廖蜀望有詩記其勝

南溪書院在南溪縣治西北唐楊發詩美其景似桃源

濂溪書院在合州學旁祀宋周濂溪

北巖書院在涪州治北宋程頤註易于此黃廷堅榜曰鈞

深堂嘉定中范仲武請為書院塑像祀之

鳳山書院在夔州府大寧縣鳳凰山建置未詳

南陽書院在夔州府宋孟珙建以處四方遊士

竹林書院在夔州亦宋孟珙建以待四方遊士

金華書院在潼川府射洪縣北元至正間建肖唐陳子昂

像祀之

張九宗書院在遂寧縣書臺山唐貞元間建

東臺書院在鹽亭縣西南二十五里宋任伯傳讀書處

東館書院在眉州城西七十五里東館鎮宋紹興初鄉士

創為肄業之所馮時行有記元至正間重修

柵頭書院在丹稜縣東北二十五里柵頭鎮宋紹興間縣

今馮時行建

鶴山書院在瀘州治南宋魏了翁建

五峯書院在瀘州城北五峯山下宋慶曆間尚書楊汝明

創為士友講會之所

龍門書院在江安縣東七十五里宋乾道中鄉士呂伯祐

建

魏了翁書院在邛州蒲江縣治北宋嘉定間建又了翁嘗

築室白鶴山下曰鶴山書院聚書授徒由是蜀人始知

義理之學

玉淵書院在舊黎州城內宋開禧初知縣薛紱建于崇德

祠西

福建

勉齋書院在福建府城內宋儒勉齋黃榦讀書之所

三山書院在福州府西湖旁宋提刑王必建

古靈書院在侯官縣陳襄讀書處

尊拙書院在侯官縣三山驛西宋林之奇講學處

龍江書院在福清縣東南宋時建

石塘書院在福清縣宋景定四年立林公遇講學處

城用書院在古田縣南宋時學元改為書院

浣溪書院在古田縣西宋時建

螺峯書院在古田縣西宋時建

藍田書院在古田縣東宋時建以上三書院皆朱熹書扁

嵩高書院在古田縣元時卽學基建書院

清源書院在泉州府宋嘉泰中郡守宗希袞建

歐陽書院在泉州府唐歐陽詹讀書于此

大同書院在同安縣元至正間邑令孔公俊建請額賜名

以祀朱文公

石井書院在泉州府晉江縣西南石井鎮舊名鰲頭精舍

朱松鎮于此熹官同安皆有教及民嘉定中鎮官游絳

立書院塑二先生像祀焉

泉山書院在晉江縣宋咸淳中建今改為學

建安書院在建安縣郡守王埜立以祀朱熹

紫芝書院在建寧府學宋時建以待四方賢士

鰲峯書院在建陽縣西崇泰里唐尚書熊秘建

廬山書院在建陽縣廬山下宋儒游酢建又崇安縣建書院以祀酢亦扁曰廬山書院

雲谷書院在建陽縣朱文公建

雲莊書院在建陽縣嘉熙中建祀劉燭

考亭書院在建陽縣西三桂里唐御史黃端構亭以祀其

先朱熹晚年居此理宗詔立書院親書扁額

同文書院在建陽縣崇化里朱熹建

瑞樟書院在建陽縣劉仲會建劉氏視樟榮枯為盛衰

武夷書院在崇安縣武夷山朱熹建精舍于此景定中命

建書院設山長

廬峯書院在建陽縣西北峯下宋蔡沈建理宗書扁賜之

文定書院在崇安縣西元縣尹彭庭堅建祀宋儒胡安國

以其子寅寧宏及從子憲配

屏山書院在崇安縣東南屏山下一名忠文元時建前祀

孔子後祀劉子翬朱熹劉珙其一在建安後改為學

南山書院在崇安縣宋儒蔡沈建

湛盧書院在松溪縣西元末建祀朱文公

諫議書院在延平府沙縣治西宋陳瓘嘗為諫議嘉定初

郡守余景瞻即其故宅建書院

豫章書院在沙縣元至正中羅從彥五世族孫建

鳳岡書院在沙縣鳳凰山下宋邑人黃顥建

九龍書院在延平府有宣聖四配十哲像及楊時羅從彥李侗朱熹四公像蓋四公講學所也

龜山書院在將樂縣封山麓卽龜山先生舊宅宋咸淳初建

延平書院在南平縣劔津之洋宋嘉定間郡守陳宓建南山下祀延平先生李侗後守董汝徒此有禮殿祠堂明

誠忠恕敬義中和四齋及光風霽月亭景溪書院在政和院祀朱文公父子

雲根書院在政和院朱松所建文公謁祖墓必信宿于此今廢

南溪書院在尤溪縣治南宋朱熹生于此嘉熙初縣令李

修建祠以祀熹及其父松咸淳初增置書院于其右元分祠爲二


雙峯書院在順昌縣宋咸淳中邑人廖邦傑建祀楊時廖剛朱熹廖德明四先生

涵江書院在興化府莆田縣東北宋知軍事楊棟建祀唐莆田令先聖裔孔仲良理宗賜御書扁元至大中訪求

孔氏之後得五十三代孫敬山遂以明經舉充涵江書院山長令世紹其職

樵溪書院舊在邵武府東門外宋景定中知軍錢謙孫建以祀丞相李綱元時移置城內樵樓五曲之上

雲巖書院在光澤縣雲巖山下宋果齋李方子講學之所



元天曆中縣尹况達建虞集有記

雲谷書院在建寧縣南宋待制俞豐讀書所後致政歸扁

曰雲谷書院有怡雲來薰致爽舒嘯浮香諸亭

崇仁書院在光澤縣北元至正中邑人龔永劉濂建

翠雲巖書院在汀州歸化縣宋熙寧間立張若谷陳世卿

避亂讀書于此

龍江書院在漳州府登高山舊為臨漳臺宋朱熹守漳時

將築室講學未果後守危楨創書院以成其志元泰定

間郡儒黃元淵亦建龍江書院于城外東北虞集有記

丹詔書院在漳浦縣南二都宋紹定間南詔場西尉周申

建淳祐中郡守黃朴書額

東山書院在福寧州宋淳祐中邑人林仲明讀書所

來青書院在寧德縣姚周二族朔

廣東

濂泉書院在廣州府城內宋建祀濂溪周惇頤

尊韓書院在陽山縣東唐韓愈讀書于此後人因建書院

丞相書院在連州嘉魚場之左宋相張浚嘗寓此後人建

書院祀之

古岡書院在新會縣治西南元至元間縣尹沈壽建

湘江書院在韶州府帽子峯南麓宋淳祐間楊大異建祀

周惇頤

涵暉谷書院在英德縣涵暉谷宋景德初郡守王仲達奉

詔建後慶曆初守宋任天禧中守臧制修之

孔林書院在南雄府城東一百里唐憲宗時曲阜孔戣爲
嶺南節度使因家焉後孫振玉始建書院

豐湖書院在惠州府歸善縣南宋淳祐中建

張留書院在惠州石埭山宋丞相留正秘書郎馮禾以徵
時共學于此

羅浮書院在博羅縣西八十里宋建

鰲峯書院在龍川縣舊學元建

韓山書院在潮州府治西南隅元郡守王翰建以祀唐韓
愈趙德及宋陳堯佐吳澄記

元公書院在潮州府學西宋元公周惇頤嘗漕廣東其孫

梅叟爲郡時建

得全書院在潮州府城內宋紹興間宰相趙鼎謫潮州號

得全居士其後六世孫箕翁爲郡時建

星巖書院在肇慶府城北五里宋郡守包拯建

三洲書院在德慶州東七十里三洲巖畔祀宋周惇頤

濂溪書院一在四會縣治北金鷄山麓一在陽江縣學東

熙寧中周惇頤提刑嶺南多惠政故皆祀之

茂山書院在高州府城南八十里晉時龍驤將軍王濬謫

居高涼自號茂山嘗以禮教化民後人建書院

松明書院在石城縣西一百二十里宋蘇軾建

翔龍書院在吳川縣南一百三十里宋景炎中宰相陳宜

中建

平湖書院在雷州府城外西湖之東宋寇準蘇軾蘇轍相繼謫此軾有西湖平狀元生之語郡守陳大震取其語作書院而名之元郭思誠重修呂思誠記

文明書院在樂平千戶所城內宋蘇軾謫儋州徙濂州道經于此謂人曰斯地景勝當有文明之祥後人遂卽其地建書院扁曰文明元彭從龍重修凌光謙作記

東坡書院在瓊州府城北宋蘇軾謫昌化軍時寓此後人因其號爲建書院元時嘗設山長趙孟頫書扁

桐墩書院在瓊山縣東五里貢士陳文徽建會鄉子弟講學于此

廣西

宣成書院在桂林府治北宋景定間經畧朱禔孫以張栻召祖謙嘗遊此合二公謚爲名請建書院理宗書額賜焉

清湘書院在全州北二里宋守林岳因柳開讀書地築室館士後守程瑜請賜額趙必愿增修魏了翁記

駕鶴書院在柳州駕鶴山有碑記文字剥落

真仙書院在融縣真仙岩前宋守李興時所建
龍溪書院在慶遠縣城西二里宋嘉定間建中設孔子像旁立黃廷堅祠

江東書院在平樂府富川縣北六十里宋淳祐間澹然居

士毛基建

勾漏書院在梧州府容縣舊為州學宋建

皇明

國朝修建書院初未有禁至嘉靖十七年夏四月吏部許讚言撫按司府多建書院以聚生徒供億科擾亟宜撤毀從之萬曆十年閣臣張居正以言官之請槩行京省查革士論紛然不平然竟亦不能盡撤今據舊額書之北直隸

明道書院在青州府開州治內宋時為程純公建 本朝

萬曆三年圻知州事重修有記

獨石書院在開平衛治東南隅 本朝建

雲州書院在雲州堡東南 本朝重建

南直隸

獨山書院在鳳陽府治東南獨山麓 本朝嘉靖初御史

張維恕建

文正書院在蘇州府治范仲淹宅東元至正間建後毀

本朝宣德間重建

和靖書院在府治東南 本朝嘉靖五年重建於府城內

龍興寺

鶴山書院在府城西南隅宋魏了翁第舊址 本朝宣德

間重建

金鄉書院在府治澹臺坊內宋贈澹臺子羽為金鄉侯故

名 本朝嘉靖五年胡纘宗建

練川書院在嘉定縣學南 本朝正德間提學張鰲山廢

南寺創建

東坡書院在常州府東南祀蘇軾 本朝弘治間建

濂溪書院在鎮江府丹徒縣東南宋周惇頤嘗居焉 本

朝正統中從黃鶴山移建于此

包公書院在廬州府城南香花墩上 本朝弘治年建

毛公書院在廬江縣東北七十里 本朝嘉靖初卽漢毛

義讀書故址建

采石書院在太平府蕪湖縣昇仙橋西狀元坊內 本朝

正德間建

宛陵書院在寧國府治西 本朝正統年建

鳳山書院在寧國縣儒學旁 本朝正德間知縣王時建

甘泉書院在池州府化成寺東 本朝為禮書湛若水建

陽明書院在化成寺西 本朝為王守仁建

嘉靖十六年春二月御史游居敬疏乞戒邪僻大臣以

端士習言王守仁之學主于致良知湛若水主于體認

天理皆祖陸九淵而少變之以號召好名媒利之士然

守仁謀國之忠應變之才猶不可泯若水迂腐之儒廣

收無賴私塾書院其言近似其行大非乞戒諭以正人

心禮官覆言王守仁既經禁革不必更議若水掌教南

雍間有生徒附和標榜居敬責備太甚若水年已七十

續文獻通考 卷之六十一
三十四
屢乞休致方且慰留可再議耶 上曰若水既有成命
書院令所司毀之

東山書院在徽州府祁門縣東南 本朝正德中知府留
志淑廢東岳廟為之中祀環谷先生汪克寬

龍山書院在安慶府桐城縣治西即太霞宮故址 本朝
嘉靖間建祀周程張朱黃勉齋游廣平

皖山書院在潛山縣即天寧寺故址 本朝知府胡纘宗
以伊川晦庵嘗居潛而黃直卿游定夫皆有政績祀之

江西

正學書院在南昌府治東 本朝嘉靖中提學副使王宗
沐建祀周敦頤程明道

馬融書院在南康府建昌縣 本朝正德間知縣周廣建

釣臺書院在嚴州府城東五十里嚴光隱釣處宋時建

本朝正統初知府萬觀重修又構清風高節二軒大學
士楊溥有記

惜陰書院在臨江府新淦縣治東陶侃讀書臺下 本朝

成化初建夏寅記

金川書院在新淦縣 本朝正德七年李夢陽建祀練子
寧

一峯書院在吉安府永豐縣儒學西 本朝弘治間建祀
修撰羅倫邵寶記

雲興書院在萬安縣治西宋時建 本朝隆慶元年圻知

縣事重修有記

陽明書院在贛州府濂溪書院後王陽明講道于此 本

朝士人建

山東

尺山書院在交州府 本朝永樂十五年重建

東萊書院在萊州府 本朝景泰五年重修

河南

應天書院在歸德府城西北隅 本朝嘉靖間以社學改

建

錦襄書院在睢州駱駝岡舊為僧寺 本朝嘉靖初改建

志學書院在南陽府城外西關

豫山書院在豫山之麓俱 本朝成化八年知府段堅建

汝南書院在汝寧府城南五里 本朝成化十一年建

涑水書院在光山縣西祀宋司馬光 本朝正統九年重

修

青雲書院在汝州郊縣城內 本朝成化五年建

程子書院在寶豐縣 本朝成化十六年建

紫雲書院 成化十五年兵部右侍郎李敏奏襄城縣紫

雲山之麓臣市地三十畝有奇建屋若干楹積書數千

卷日與學者講讀其中願藉之于官以為社學 賜額

為紫雲書院

湖廣

濂溪書院在武昌府學前舊為射圃 本朝嘉靖四十三

年巡撫改建

鳳山書院在漢陽府學後 本朝趙蕃蔡鑑讀書處

郢門書院在承天府陽春臺左 本朝洪武中曹國公李

文忠鎮郢時建

昭明書院在襄陽府學西 本朝汪道昆建

鳳棲書院在襄陽府治東龐德公宅 本朝正德中為書

院祀龐統司馬徽

五賢書院在鄖陽府治北 本朝正德間建祀周程張朱

二程書院在黃州府黃陂縣魯臺山 本朝景泰中蔡受

建

龍峯書院在岳州府華容縣圓覺寺旁 本朝黎淳劉大

夏讀書處

東山書院在寶慶府城東 本朝嘉靖中建祀周敦頤以

張九成配享

陽明書院在辰州府東王守仁謫貴州講學于此鄒守益

羅洪先記

福建

石井書院在泉州府晉江縣西南石井鎮祀朱文公父子

本朝重建

鰲峯書院在建寧府建陽縣西崇泰里 本朝正統中重

修

考亭書院在建陽縣西三桂里 本朝宣德中重修

武夷書院在武夷山

同文書院在建陽縣崇化里俱 本朝正統中重修

屏山書院在崇安縣東南屏山下祀劉子翬朱熹劉珙

本朝洪武中重修

湛盧書院在松溪縣西祀朱文公 本朝景泰中重修

諫議書院在延平府沙縣治西陳瓘宅 本朝永樂中修

龜山書院在封山之麓楊時宅 本朝洪武七年建

延平書院在劍津之陽祀李侗 本朝永樂初重建

南溪書院在尤溪縣治南朱文公生此 本朝永樂中重

修

薌江書院在漳州府城東北二十里 本朝洪武初知府

錢古訓建祀朱文公

鴻江書院在漳浦縣東十七都 本朝洪武中鄉人陳則

彙建授徒講學

泰亨書院在長泰縣南登科山 本朝洪武末教諭章叅

建以教鄉士子

狀元書院在登科山之西 本朝正德六年副使楊子器

建塑狀元林震像

東巖書院在玄鍾所舊為佛刹 本朝嘉靖五年叅政蔡

潮改建塑朱文公像于中以北溪勉齋配

廣東

濂泉書院在廣州府城內祀周濂溪 本朝正統中重建
崧臺書院在肇慶府治東二里石頭庵 本朝正統間改
為書院

廣西

宣城書院在桂林府治北祀張栻呂祖謙 本朝洪武初
以其地為桂林縣學正統間復建于學之西

清湘書院在全州北二里 本朝永樂間重修

三元書院在梧州府藤縣治西宋馮京讀書處 本朝建

純心書院 嘉靖三十一年 楚王英僉奏請書院額

上賜名純心并四書五經集註各一部後屢有請 萬
曆十年議准 宗室中有讀書好禮奏討書籍及以書

院請名者禮部俱與題覆請給但不許假借虛名以滋
欺罔書籍簿數書院名額俱取自 上裁其蓋造書院
止令自備工料不得因而干涉有司煩擾百姓違者許
撫按官叅治

義學

宋

侯宣衡陽人少遊四方還家築室道旁俾遊學之士館焉
行之二十年曾無倦色遠近號曰侯家書院

洪文撫南康建昌縣人於所居雷湖北創書舍集學者太
宗飛白一軸曰義居以賜之

汪紹婺源人開義學教鄉里子弟割田三百畝以充膳延

舊邑簿呂廣問爲師

林國鈞莆田人創書堂延林光朝爲師復置田以贍來學之士學者空郡從之謂之紅泉義學

黃問字公裕莆田人創學于居廬之南以聚四方英俊號上林秣齋其齋中有五規一曰修身謹行二曰立志抗節三曰潛心經術四曰學通世務五曰限日收功

范仲淹蘇州人建義學于天平山西延師以教同族及四方學者號爲范氏義學中有孔子廟後又增仲淹祠中清白堂左右設敬身知本兩齋

蔣沐東陽人景定五年建義學于縣南以訓四方來學者號楊城義學元至正間沐四世孫大同重修學者益衆

鍾鼎上猶人嘗觀范仲淹義田偕姪日新置義莊建書院教鄉族子弟子三傑登紹興進士

方泳莆田人天禧間與弟洞築義齋以來四方賢士歲不下五十餘人時號壽峯義齋

新昌縣有萬卷堂爲義學尚書石待旦所建杜衍輩由此登科凡七十二人

劉允迪玉山縣人割田剗室聘名士以教族子弟及鄉人願學者號曰劉氏義學 朱文公記畧曰今士大夫徒步至三公然一日得志則高堂深池撞鐘舞女所以自樂其身者惟日不足雖廩有餘粟府有餘錢不爲里黨灾害足矣義學之舉固未暇及也如劉侯者身雖寵而

未登六品家雖温而未能千金乃其用心如此可謂賢於人遠矣

王必正尤溪人宋紹定間慕范文正公為人以郭外田五百餘畝勸義莊以資族人冠婚喪祭之費又設義塾延師以訓族里子弟四人慈恭懃懃皆登進士第

王沂之晉江人端平間以曾祖秉嘗立義齋延師誨學者遺命子起震繼其志闢堂于家之南扁曰文雅列廢而四捐田三百餘畝以贍師生真德秀表其閭曰義塾

周天賦仙遊人與弟翔義塾撥田租七十斛以供束修之費

元

邵天驥其先洛人高祖宗穆始家華亭香浦鄉志在澤物開義塾以教鄉之子弟割田二百餘畝給之

姚玉用華亭人至治中割田立義庄以周宗族鄉黨建義塾以教鄉之子弟後郡守孫秉禮聞其義委葺西湖書院遷義塾其中以便學者



吳森嘉興人家饒於貲施予不吝嘗捐田二頃建義塾訓鄉人至大間廉訪使以名聞表其門曰義士

韓元善字大雅汴梁之太康人仕至中書左丞至正交鈔初行賜近臣各三百錠元善以買田六百畝為義塾延名士教族人子弟

陸天祐鄞縣人欲建義塾以教鄉子弟未就而卒遺命子

居敬思誠置田廣居構學一區于東湖之里崇奉朱文
公像浙東帥王本齋命名曰東湖書院割田一頃六十
畝竒以為報祀餼廩之需建先進祠祀鄉先生陳文介
公而下凡十人延師講學以淑一鄉子弟

應本仁字本立鄞人素慕范文正為人建義莊創屋舍五
百餘間割慈谿腴田五百餘畝以濟鄉親貧乏又即其
中為義塾延名師以訓導鄉親子弟供膳服用悉有常
制時其出納定其條約使後裔世守之世傳為應家館



續文獻通考卷之六十一終

